


USA KA PARADOX

 Mahimo na kamong manglingkod. Dugay-dugay pud kong naghulat nga makabalik dinhi sa Phoenix. Mao nga malipayon gayud ako nga maania dinhi niining hapon. Ngani pag ania ako sa Phoenix, aduna gyu'y sa kung unsang butang dinhi, nga pirming nagapabati kanako nga nagalingkod ako uban sa mga tawo nga akong mga higala, nga nagahigugma kanako. Ug—ug daghan pud ang mga taga dinhi nga mga mainampoon kaayo nga nagaampo para kanako, sulod sa pila na ka tuig. Kanunay kong mahinumduman ang akong unang panagtigum nga napahigayon dinhi uban sila Igsoong Outlaw, Igsoong Garcia, ug ang mga ministro dinhi sa siyudad. Nagpanalangin gayud ang Ginoo kaniadtong nagasugod pa lang ako sa akong mga panagtigum! Sukad kaniadto, ang Phoenix aduna gayu'y dakung... Aduna gyu'y butang sa kasingkasing ko, nga malisud isaysay.

² Kaniadtong bata pa lang ako, gusto ko na gayud nga makaanhi sa Phoenix. Kanunay kong mabasa kaniadto ang mahitungod sa disyerto. Aduna gani ako'y mga hamubong tula nga gisulat, mahitungod sa Arizona, niadtong usa pa lang ko ka batang lalaki.

³ Mao nga malipayon kaayo ko nga nahimong usa—usa na ka lumulupyo dinhi karon. Siguro halos usa ka tuig na ko dinhi, ug tingali'g sobra pa diyutay. Pero dili na kamo makakita og ingon ka mas dugay pa kay kanako dinhi. Ang tanan nga akong makatagbo, moingon ko, “Lumad ka ba dinhi?”

“Bueno, sukad kaniadto. Dugay-dugay na pud ko dinhi.”

⁴ Ug—ug sa hunahuna ko kinahanglan ko pang moadto didto sa reserbasyon sa mga Apache, o kung asa man, para makatagbo og usa ka tinuod nga lumad dinhi.

⁵ Ug adunay miingon, dili pa lang dugay, miingon, “Igsoong Branham, ganahan ka ba sa Arizona?”

⁶ Ingon ko, “Bueno, dugay na kini nga usa sa mga ginahinam-hinam gayud nako sa tibuok kong kinabuhi, ang—ang mopuyo dinhi sa Arizona, ug gitugot kana kanako sa Dios.”

⁷ Ania kita karon dinhi sa dili pa magsugod ang konbensyon sa Business Men, nga nahimo nang usa ka tinuig nga butang para kanato. Ug niining hapon, nagkatigum kita dinhi para sa pasiuna nga panagkatigum sa dili pa ang konbensyon nga magsugod sa Huwebes sa gabii, sa hunahuna ko. Pribilihiyo kini para kanako, sa nangaging—nangaging pipila ka tuig, nga makaanhi ug magpahigayon og ingon niining gagmay'ng

mga panagtigum sa palibot, sa dili pa magsugod ang mismong panagtigum sa . . . o ang konbensyon, diay, nga pagasugdan.

⁸ Ug si Igsoong Williams usa gayud ka suod ko nga higala, siya ug si Igsoong babayeng Williams. Aduna sila og mainiton nga bahin sa akong kasingkasing. Pirmi nila akong ginadapit nga mobalik, ug busa malipayon kami nga dawaton kana nga pagdapit niining hapona.

⁹ Ania usab sa entablado, si Igsoong Fuller, si Igsoong Jewel Rose, ug si Igsoong Tony Stromei nga taga Tucson, ug si Igsoong Borders nga tigdumala sa among dagkung buluhaton. Ug ang—ang buutang tigulang og bililhong igsoong, Arganbright, dugay pud kami nga nagkauban sa daghan nang malisud nga mga pagpakigubat. Sa pikas bahin sa suba; nagalaum ako nga makauban ko siya pag didto na sa pikas bahin sa dakung suba sa umaabot nga adlaw.

¹⁰ Dili ko lang madumduman ang ngalan sa igsoong lalaki, pero naningkamot ko nga dumdumon. Unsa gani ang ngalan mo, igsoon? [Nagaingon ang igsoong lalaki, “Al Booher.”—Ed.] Booher, Igsoong Booher. Ako—nakaila bitaw ko sa iyang nawong. Ug dili ba ikaw man usab kadtong nagahubad usahay para sa . . . [“Nagahubad para sa mga bungol.”] para sa mga bungol. Kana’y . . .

Ug malipayon gayud kami nga makauban kamong tanan dinhi.

¹¹ Sa pagtan-aw ko dinhi dapit sa akong atubangan, ug nakita ko ang pipila sa akong mga higala nga gikan pa sa Arkansas, og mianhi dinhi. Kaniadtong nakaanhi ako sa unang higayon, gisultihan ko kamo nga bisan asa ako moadto, aduna ko’y mahinagbo nga taga Arkansas. Sigurado ako, pag didto na ako sa Langit, aduna gihapon ako’y mahinagbo didto nga pipila ka mga taga Arkansas, tungod kay sila gayu’y maunongon, og matinud-anon nga mga tawo.

¹² Ug bueno, kasagaran dugay ako mamulong, pero ginapaningkamotan ko kutob sa akong mahimo nga medyo han-ayon ang akong mga Kasulatan ug mga sinulat aron nga dili ako mamulong og dugay. Ug gusto ko usab nga mag-ampo para sa mga may sakit samtang ania pa ako sa Phoenix.

¹³ Karon, ang Mensahe nga akong . . . nga gitagana sa Ginoo kanako, kini’y usahay, kabalo na mo, kini nga mga butang medyo sensitibo. Ug ingon na niana kini sa una pa sa matag kapanahonan. Ug ginapaningkamotan ko gayud kutob sa akong mahimo nga magpabilin Niini. May sa kung unsang butang gyud Niini. Ug Kung dili ko isulti kanang butang nga gisulti kanako sa Dios, ug kung kini’y—kini’y dili iya sa Dios, nan Siya . . . wala kini diha sa Pulong. Apan kung anaa man kini sa Pulong, ug kini usa ka saad alang niini nga panahon, kung ingon niana mabati ko gayud nga husto ang akong ginabuhat, tungod kay

ginapaningkamotan ko lamang nga tumanon ang Iyang gikasaad alang niini nga panahon.

¹⁴ Ug sa makadaghang higayon pag masupak mo ang usa ka tawo sa ilang teolohiya, masuko sila kanimo, sa gilayon. Apan dili man unta angay'ng ingon niana. Ngani gapaningkamot ko nga... Aduna ko'y mga higala nga gikan sa tanan nang nagkalainlaing mga iglesiang denominasyon, ug uban pa, pero wala gyud ko sukad nahiubos kanila nga mga kaisaon. Aba, nagatambong pa gani ko sa ilang mga simbahan, sa bisan asa nga ginadapit nila ako nga motambong, ug mamulong. Apan dili man unta kita angay'ng mahiubos, tungod lang sa gagmay'ng mga ideya.

¹⁵ Pero, abi ninyo, kung mosulti ako ug unsa man nga lahi sa kung unsa ang anaa sa akong kasingkasing, nan mamahimo akong usa ka hipokrito. Ug ako—ako... Ipahilayo lang unta! Mamahimong tagboon ko Siya sa umaabot nga adlaw, ingon nga usa ka makasasala, apan dili ko gayud gusto nga tagboon Siya ingon nga usa ako ka hipokrito. Tungod kay gusto ko nga mahimong tinuod. Ug kung basta ko na lang ingon, “Bueno, laktawan ko na lang Kini tungod kay ang tanang uban pa kanila nagatoo man og *ingon-niini*, *ingon-niana*,” nan unsa na lang ko nga matang sa tawo kung ingon-ana? Dili gyud kamo magkaaduna og pagsalig kanako, ug dili pud ko magkaaduna og pagsalig sa Dios o sa kaugalingon ko, kon masayon ra kaayo ko magapakigkompromiso.

¹⁶ Ang si kinsa man kinahanglan magkaaduna gayud og usa ka butang nga sigurado siya. Ug mao kana ang higayon nga mahimo n'yong ibasi ang inyong pagtoo, sa diha nga sigurado na kamo. Apan gawas kon sigurado na kamo, og kung aduna pa'y pagduhaduha, nan pasagdi lang sa hangtud nga makasigurado na kamo.

¹⁷ Bueno nanghatag na man tingali si Billy og mga prayer kard, nga sa hunahuna ko iyang... Oo, gisultihan ko man gud siya. Ug sa hunahuna ko gisultihan man pud ko niya, kaganina, nga nakapanghatag na kono siya. Gikan niana dinha, magtawag ko og pipila nga moanhi sa linya sa pagpaampo, pagkataudaud, aron nga maiampo na. Ug kung dili man matawag ang inyong kard... Kung—kung natawag, diay, ug dili pa kamo sigurado nga ang Dios mao ang mananambal ug pagaayohon Niya kamo, nan walay mahatag nga kaayohan ang inyong pagduol dinhi, tungod kay dili gyud kamo mamaayo. Kamo, kung aduna man kamo'y pagduhaduha, moingon mo, “Bueno, karon, may sa kung unsang butang pa man sa akong kinabuhi, og kinahanglan ko gayud nga ihusto kini,” nan ihusto kana, una, ug pagkahuman anhi mo nganhi sa linya sa pagpaampo, kita n'yo.

¹⁸ Tungod kay, ang kaayohan mao man ang tinapay sa mga anak. Nasayod kita niana. Anaa kini sa pangbayad-sa-sala, ug

ang pangbayad-sa-sala ginaaplikar una sa atong mga kalag. Ug ang pagpang-ayo kanunay nang nagauna sa matag mensahe, ug usa usab kini ka pamaagi aron matigum ang mga tawo. Ug usa pud kini ka . . .

¹⁹ Daghang mga tawo ang mahimong moabaga sa usa ka panagtigum para sa pagpang-ayo, daghan pud ang motambong sa panagtigum para sa pagpang-ayo, o kaha sa usa ka buluhaton sa panag-awit, apan paghisgotan na ang pagluwas sa usa ka makaluluoy'ng nahisalaag nga kalag, dili gyud ingon ka daghang mga tawo ang interesado niana. Gusto lang nila . . . Apan mao baya kana ang pinakamahinungdanong butang. Ang Balaanong pagpang-ayo ug mga buluhaton sa panag-awit, ug uban pa, igo lamang . . . Maingon sa ginasulti ni Igsoong Bosworth kaniadto, “Paon ra kana sa taga.” Ug ang paon man mao’y imong ginapakita sa isda, dili ang taga.

²⁰ Ug mao kana ang importante, ang danihon ang mga tawo nga maminaw kadali, hangtud nga maipahayag mo gayud ang imong mensahe ngadto kanila. Ingon-ana man pud ang ginabuhay sa Dios sa matag kapanahonan, sa tanang kapanahonan, aduna sa kanunay og dakung buluhaton sa pagpang-ayo. Ug kung tinuod man kini nga buluhaton sa pagpang-ayo, sa luyo niini nga buluhaton, sa kanunay, aduna gyu’y mensahe. Wala gyud sukad-sukad og gikahatag nga ilhanan para lang ingon nga usa ka ilhanan; kondili pagpasiuna kini sa usa ka mensahe.

²¹ Ug nagatoo ako sa mao gihapong butang, dise-siete ka tuig na ang milabay, o dise-otso ka tuig na karon, kaniadtong gipadala ako sa Ginoo aron magsugod sa pag-ampo para sa mga may sakit. Nahimo kadtong usa ka dakung rebaybal sa taliwala sa mga tawo. Daghang mga halangdon nga alagad sa Dios ang nanagsangyaw sa dagkung mga buluhaton sa pagpang-ayo, ug, apan ang buluhaton sa pagpang-ayo, kini mismo, kung magpabilin ka lang sa mao gihapong naandan nga dagan niini kaniadto, aduna gayu’y sayup, kana nga buluhaton sa pagpang-ayo dili diay pinadala sa Dios. Kinahanglan man gud niini nga danihon una ang pagtagad, kita n’yo, danihon ang pagtagad, ug dayon dunay usa ka mensahe.

²² Si Jesus, kaniadtong mianhi Siya, nga nagapang-ayo sa mga may sakit, ug uban pa, Siya’y usa ka bantugan nga Propeta para nilang tanan kaniadto. Apan sa dihang hinayhinay Niyang gisulti kanila ang Kamatuoran, sa Ebanghelyo, kung Kinsa Siya ug kung unsay hinungdan nga mianhi Siya, nan Siya’y—Siya’y nahimong dili na popular human niadto. Ug ingon na niana gayud ang nagakahitabo sa tanang nangaging kapanahonan, ug magapadayon gihapon nga ingon niana.

²³ Karon ania kita niining hapon, ug dayon ugma sa hapon dinhi sa mao ra gihapong awditoryum. Alas siete man pirmi. Husto ba kana, igsoon? [Nagaingon ang igsoong lalaki, “Alas

siete-traynta.”—Ed.] Alas siete-traynta, ugma sa hapon, o sa gabii diay, ug dayon Martes sa gabii. Ug siguro sa Miyerkules sa gabii, usab. [“Dili, didto na sa Ramada Inn, sa Miyerkules.”] Didto na diay sa Ramada Inn, pagka Miyerkules. Ug dayon sa Huwebes, husto kana, magsugod na ang—ang konbensyon. Ug kon itugot sa Ginoo, buut ko nga maania dinhi sa tanang buluhaton niini.

²⁴ Ania ako, nga inyong igsoon, usa ka katabang sa Gingharian sa Dios, aron tabangan kamo sa bisan unsa nga mahimo ko. Para tubagon ang inyong pangutana, tingali’g dili ko mahimong buhaton kana. Apan, pinaagi sa pag-ampo, mahimo gyud natong masabtan kung iampo nato kini ug moduol sa Dios mahitungod niini, ug dili maghimo og kaugalingon natong mga opinyon.

²⁵ Kung nagmasakiton kamo, gusto ko unta nga ayohon kamo, apan wala ma’y tawo ang makahimo niana. Humana man gud kini. Ang kaayohan nagadepende na kaninyo. Ang inyo kining pagtoo diha sa tapos na nga mga buhat nga gibuhad sa Dios didto sa Kalbaryo, pinaagi ni Jesus Cristo. Ug gawas niana, walay kaayohan; ug gawas usab niana, walay kaluwasan; walay iglesia, walay denominasyon, walay seremonya, wala na’y uban pa nga makahatud og kaluwasan. Si Jesus Cristo, “Siya gisamaran tungod sa atong mga kalapasan, tungod sa Iyang mga labod kita nangaayo. Siya *gisamaran* tungod sa atong kalapasan, mga kalapasan,” pasayloa ako, “tungod sa Iyang *mga* labod kita,” ang tanan human na kaniadto pa, “kita nangaayo.” Karon, pinaagi gyud niana!

²⁶ Wala kaayo ko’y igong oras kondili pipila lamang ka gutlo aron mamulong, niining hapon, para kaninyo, tingali’g baynte, traynta minutos lang, ug pagkahuman magpahigayon na kita og linya sa pagpaampo. Kada adlaw, sama sa naandan na, duna ma’y mga bag-ong tawo nga nagaabot, mao nga duna usab og mga bag-ong prayer kard nga igapanghatag. Apan buhaton namo ang tanan kutob sa among mahimo, ang tanan nga igatugot sa Dios kanamo nga buhaton, aron iampo ang matag masakiton nga tawo nga moduol, og nagatinguha nga maiampo.

²⁷ Kung pananglitan may tawo nga moanhi dinhi nga misakay og eroplano, nga naghimalatyon na, nga kinahanglan maatiman dayon o mora’g ingon-ana, bueno, mahimo man ninyong pakigkitaan si Igsoong Williams, si Billy Paul, o bisan kinsa kanila aron mapahimutang sila sa usa ka lawak, tungod ayaw na nilang . . . Dili na sila puedeng maglingkod pa dinha, tungod naghimalatyon na sila, kinahanglan nila nga matabangan dayon, bueno, mao nga ipahimutang sila sa usa ka lawak aron nga maatiman ko sila sa gilayon.

²⁸ Apan mas maayo, kung wala unta kamo sa ingon nianang kahimtang nga kinahanglan maatiman dayon, nga inyong—nga kuhaon ninyo ang inyong mga kredo ug—ug inyong mga

tinoohan, ug ipadaplin kana sa pipila ka minuto, aron dunay igong panahon nga makapatalinghug sa kung unsay ginaingon sa Kasulatan, ug kung unsay pagabuhaton sa Dios mahitungod sa Iyang mga gisaad. Ug magapalig-on kana sa pagtoo. Ug dili n'yo na gani kinahanglan nga moapil sa linya sa pagpaampo, o kinahanglan pa nga may mag-ampo para kaninyo. Naayo na kamo, kung mahimo n'yo lamang toohan kini. Kita n'yo? Ug mao kana ang katuyoan niini, ang maipaila kaninyo, ang ipaampo, kaninyo, kung unsay gibuhath ni Jesus alang kaninyo.

²⁹ Dili na man kinahanglan nga moduol pa mo dinhi ug moluhod, ug mag-ampo og ayo, hangtud nga kamo—hangtud nga kamo maluwas. Luwas na kamo, apan kinahanglan ninyong dawaton kini. Dili ang inyong pag-ampo mao'y makaluwas kaninyo. Kondili pinaagi sa inyong pagtoo kamo naluwas, dili pinaagi'g pag-ampo. Apan, “Pinaagi og pagtoo kamo naluwas.” Mao gihapon sa pagpang-ayo. Sigurado ako nga nasabtan natong tanan kini.

³⁰ Ug kung duna ma'y mga estranyo sa atong mga pultahan, buut namo nga mahibaloan n'yo, nga ako, o kining grupo nga akong kauban dinhi, ang Full Gospel Business Men, wala kami may ginarepresentar ni usa ka denominasyong organisasyon. Ang among ginarepresentar mao lamang ang mga Cristohanong magtotoo nga anaa sa tanang denominasyon. Mao nga ginadapit gayud ang tanan. Malipay gyud kami nga makauban kamo dinhi. Moingon mo, “Bueno, miyembro man ako sa usa ka iglesia, puede kaha akong maiampo?” Dili gani kinahanglan kon kamo ba'y miyembro sa usa ka iglesia, dili n'yo kinahanglan nga mobuhath og unsa man kondili duol lang mo dinhi ug toohi n'yo ang Dios. Mao lang kana ang kinahanglan n'yong buhathon. Ang Dios na ang bahala sa uban pa.

³¹ Bueno, ako'y—ako'y. . .nagamit ko na og ayo ang usa ka Biblia, sukad niadtong pagsugod ko sa dagkung mga buluhaton sa pagpang-ayo, o pagpang-ampo para sa mga may sakit, diay. Didto sa Houston, Texas, gihatagan ako og Biblia, pila na ka tuig ang milabay, mga dise-otso ka tuig ang milabay, gihatag kadto ni Igsoong Kidson ug sa iyang mga miyembro. Ug nagamit ko na og ayo kadto nga Biblia, sa akong pagbiyahe-biyahe, sa tibuok kalibutan, hangtud nga gisi-gisi na gayud kadto, nangalaknit na ang mga panid niadtto.

³² Bag-ohay lang ko gihatagan og usa ka bag-ong Biblia. Ug ang makahibulongan nga butang. . .dili man ko matuo-tuohon; nanghinaut ko nga dili unta ninyo hunahunaon nga matuo-tuohon ako. Sa dihang gihatag kanako kadto nga Biblia, aduna kadto og gagmay'ng. . .duha ka gagmay'ng pang-marka, gagmay'ng mga laso. Sama sa akong Biblia kaniadtto.

³³ Ang gihatag kanako ni Igsoong Kidson kaniadtto usa ka Scofield nga Biblia, bueno, dili tungod nga nagauyon ako

kang Mr. Scofield bahin sa iyang mga sinulat. Karon, tingali'g dunay pipila kaninyo ang nagauyon, pipila pud kaninyo ang dili nagauyon, apan gusto ko lang ipahibalo kaninyo nga dili ingon nga nagagamit ko og Scofield nga Biblia tungod kay gatoo ko kaniya. Apan tungod kay, maayo man gud kaayo ang pagbahinbahin niya sa mga parapo niini nga akong. . . Mao kadto ang usa sa pinakauna kong mga Biblia, ug natun-an ko nang basahon kadto nga ingon-niadto ang pagkahan-ay. Ug ginagamit ko sa gihapon ang maong Biblia. Nga, kung aduna man ko'y Thompson Chain, mas maayo unta. Mas dali man gud nakong mapangita ang akong teksto sa Thompson Chain Reference.

³⁴ Apan sa dihang giablihan ko kadto nga Biblia, ang usa ka gamay'ng laso niini nga pang-marka sa Biblia kahibulongan gayud, kon diin kini nakalup-it. Nakalup-it kini sa bahin nga kaniadtong gihalad ni Solomon ang templo sa Dios, ug ang Himaya sa Dios hilabihan kadaku, ang kahimayaang Shekinah nga atua sulod sa bilding, hangtud nga ang mga sacerdote dili na makahimo sa pag-alagad.

³⁵ Ug dayon ang usa pa ka laso nga pang-marka nakalup-it kini sa bahin kon diin si Esdras mibalik ug gihalad niya ang templo kaniadto.

³⁶ Ug ang ikatulong gamay nga pang-marka, nga gihatag kanako sa akong asawa ug iyang gilup-it sa Biblia, wala ko kahibalo, nga aduna diay kadto og ngalan nako, ug uban pa, nakalup-it kadto sa Marcos 11:22. Gilup-it niya lang kadto sa Biblia, ug napahimutang dinha, sa, "Kung magaingon ka niining bukid, 'bumalhin ka.'" Ug nasayod man mong tanan sa dihang nadumduman ko kana nga Kasulatan, kamong mga tigpaminaw sa teyp, nga mao kadto ang pagtungha sa mga squirrel, ngadto sa—sa. . . Eksakto gayud kana.

³⁷ Ug usab ang makahibulongan nga butang, ang akong paborito nga langgam, nga robin, naka-printa diay ang hulagway niini sa maong pang-marka, ang gamay'ng langgam nga pula ang dughan. Sumala sa sugilanon, nga kaniadto kono usa kini ka kaphion nga langgam; apan usa niadto ka adlaw, adunay usa ka Tawo nga naghimalatyon, didto sa krus, ug naluoy kaayo kini sa maong Tawo mao nga milupad kini mismo paingon didto og naningkamot kini sa pagbira nga maibot kadtong mga lansang, ug mao nga nalukop sa Dugo ang gamay'ng dughan niini, ug sukad niadto nahimo na nga pula ang dughan niini. Ingon niana usab ang gusto ko—ko nga pagtagbo sa akong Manluluwas, nga, ang Iyang Dugo anaa sa akong. . . sulod sa akong dughan, sa akong kasingkasing.

³⁸ Ug dayon sa akong unang panagtigum, ang Mensahe nga akong iwali dinhi, mao'y dinhi sa Phoenix, Arizona. Ang *Phoenix* usa ka butang nga mahimong motungha gikan sa wala.

Ingon niana ang ginabuhat sa Dios. Gamiton Niya ang wala, og magpatungha og usa ka butang gikan niana.

³⁹ Ug ang akong Mensahe niining hapon, sulod sa traynta o kuwarenta minutos, giulohan nga, “Paradox.” Ug buut ko nga mobasa gikan sa Kasulatan nga . . .

⁴⁰ Pipila na ka tuig ang milabay, magpakuha ako og Biblia, ug itunol n’yo kanako ang Biblia, kaniadtong una kong pagsugod sa akong ministerio; ug dawaton ko ang inyong Biblia, ug daghan kaninyo ang nakasaksi kanako nga gibuhat kana, ablihan ko lang kini nga nakaingon *niana*, ug moingon, “Ginoo, asa man ang Mensahe para kanako?” Naabli kadto sa Josue, sa ika-1 nga kapitulo, sa bisan unsa man nga Biblia nga inyong itunol kanako kaniadto.

⁴¹ Hangtud nga usa ka gabii dihay mitungha nga usa ka pananawon, nga pamilyar na kamo, ug nakita ko kadto nga Biblia nga mipaubos gikan sa Langit, ug may usa ka kamot nga dunay hemelo, nga nakaingon *niini* nga mipaubos diha sa unang siyam ka bersekulo sa Josue.

⁴² Dinha ako magabasa, niining hapon, para sa akong pagbasa, o sa akong pagbasa sa Kasulatan. Makaplagan ang akong teksto diha sa ika-10 nga bersekulo ug sa—sa . . . ang buut kong ipasabot sa ika-10 nga kapitulo ug sa ika-12 nga bersekulo.

⁴³ Sa dili pa nato ablihan ang Biblia, iduko usá nato ang atong mga ulo sa makadiyut. Karon samtang nakaduko ang atong mga ulo ug ang atong mga kasingkasing, atong palandungon kini. Dili unta nato himoon kining usa lamang ka ordinaryo nga panagtigum; aduna man kita’y ingon niana sa tanang higayon. Kondili mag-ampo kita sa Dios, ang matag usa kanato, nga mamahimo kining usa ka talagsaon gayud, nga tungod niana padayon nga mamaania kanato ang Presensiya sa Dios hangtud sa pagtapos sa panagtigum.

⁴⁴ Langitnong Amahan, mapasalamaton kami tungod niining halangdon ug dakung pribilihiyo nga maania sa Phoenix niining hapon, nga nagkatigum dinhi niining dakung awditoryum, nga kauban kini nga tawo. Ug karon magaduol na kami sa Pulong. “Ug ang Pulong nahimong unod ug nagpuyo ipon kanato.” Ug hinaut nga mamaingon niana pag-usab, Ginoo, nga ang Pulong mamahimong unod, nga maibubo Kini sa Imong iglesia ug sa Imong katawhan, aron matuman ang mga saad sa niining panahon.

⁴⁵ Tungod naamgo namo nga kami’y—kami’y ania na sa katapusang panahon, talitapus na ang panahon. Nagapaingon na kini ngadto sa Eternidad. Ug ania na kami sa Kasadpang Kabaybayonan. Ug maingon nga mibiyahe ang sibilisasyon, gikan sa Sidlakan paingon sa Kasadpan, mibiyahe man usab ang Maayong Balita uban niini. Ug karon wala na kini’y lugar

nga maadtoan kondili mobalik na usab sa Sidlakan. Tapos na man kini.

⁴⁶ Ug ginaampo namo, Langitnong Amahan, nga mamahimo kining usa ka mahimayaong takna para kanamong tanan, aron nga mabati namo ang Presensiya sa Balaang Espiritu, ang Tagsulat niining Pulong, balik niining bilding sa tabernakulong unod; nga ginapadayag ang Iyang Kaugalingon nganhi kanamo, sa pagpasaylo sa among mga sala, sa pagpasaylo sa among kasalanan, ug dala ang kasiguradohan nga dili na Niya pagaisipon ang sala sa magtotoo, nga aduna na niana nga kasiguradohan. Ug usab pagaayohon Niya unta ang among mga balatian, ug ipalingkawas ang—ang mga tawo gikan sa mga wheel chair ug gikan sa mga kratsis; ug hatagan sila og panan-aw, sila nga mga buta; ug—ug dugang nga mga adlaw, para niadtong mga naghimalatyon tungod sa makalilisang nga mga sakit sama sa kanser ug tubercular, nga grabe na gayud, ug mga sakit nga dili maalibyoan sa among mga doktor. Lagpas na kini sa arang nilang mahimo, apan, Dios, lagpas pa man Ka sa tanang siyentipikanhong mga pagtuki. Lagpas Ka pa sa tanang pagpangatarungan. Ihatag sa Imong mga alagad, niining hapon, ang pagsulti ug pagpatalinghug sa Imong Pulong, mahitungod sa hilisgotanang: *Usa Ka Paradox*. Kay amo kining ginapangamuyo sa Ngalan ni Jesus. Amen.

⁴⁷ Karon diha sa Biblia, sa Josue sa ika-1 nga kapitulo, ug sa Josue sa ika-10 nga kapitulo. Ang ika-1 nga kapitulo ug ika-1 nga bersekulo.

Karon nahitabo sa tapus ang kamatayon ni Moises ang alagad sa GINOO, nga ang GINOO misulti kang Josue ang anak ni Nun, ang ministro ni Moises, nagaingon,

Si Moises ang akong alagad patay na; busa karon bumangon ka, ug tumabok niining Jordan, ikaw, ug kining tibuok katawohan, ngadto sa yuta nga akong igahatag kanila, bisan ngadto sa mga anak sa Israel.

Ang tanang dapit nga pagatumban sa lapalapa sa inyong tiil, kana gihatag ko kaninyo, sumala sa gipamulong ko kang Moises.

Gikan sa kamingawan ug niining Libano bisan ngadto sa dakung suba, ang suba sa Eufrates, ang tanang yuta sa mga Hetehanon, ug ngadto . . . sa pagasalopan sa adlaw, mao'y utlanan ninyo.

Walay bisan kinsang tawo nga arang makasukol kanimo sa tanang mga adlaw sa imong kinabuhi: ingon nga ako nag-uban kang Moises, mao man magauban ako kanimo: ikaw dili ko kawangon, ni biyaan ko ikaw.

Magmakusganon ka ug magmaisug ka: kay pinaagi kanimo kining katawohan makapanunod gyud sa yuta,

nga akong gisaad sa ilang mga amahan nga akong ihatag kanila.

Magmabaskugon ka lamang ug magmaisug gayud, sa pag-atiman sa pagbuhat sumala sa tanang balaod, nga akong . . . nga gisugo kanimo ni Moises nga akong alagad: ayaw pagtipas ngadto sa too ni ngadto sa wala gikan niana, aron magmauswagon ka bisan asa ka paingon.

Ayaw pag-ibulag kining basahon sa kasugoan sa imong baba; hinonoa nga magpalandung ka niana sa adlaw ug sa gabii, aron himatngonan mo sa pagbuhat sumala sa tanan nga gisulat dinha: kay sa ingon niana nga ikaw magmauswagon sa imong mga panaw, ug unya makab-ot mo ang kauswagan.

Wala ko ba ikaw sugoa? Magmakusganon ka ug magmaisug; ayaw pagkahadlok, ni magmaluya ka: kay ang GINOO nga imong Dios magauban kanimo bisan asa ikaw paingon.

⁴⁸ [Si Igsoong Branham nagabasa na karon sa Josue 10:12-14—Ed.]

Unya misulti si Josue ngadto sa GINOO sa adlaw nga ang GINOO mitugyan sa mga Amorehanon sa mga anak sa Israel, ug miingon siya sa atubangan sa Israel, Humunong ka . . . Adlaw, humunong ka . . . sa Gabaon; ug ikaw, Bulan, sa walog sa Ajalon.

Ug ang adlaw mihunong, ug ang bulan wala lumakaw, hangtud ngina ang nasud nakabalus sa ilang mga kaaway. Wala ba kini mahasulat sa basahon ni Jasher? Ug ang adlaw mihunong sa taliwala sa langit, ug wala magadali sa pagsalop sa tibuok nga adlaw.

Ug walay adlaw nga sama niana sa una kun sa ulahi niya, nga ang GINOO nagpatalinghug sa tingog sa tawo: kay ang GINOO nakig-away alang sa Israel.

⁴⁹ Hinaut nga igadugang sa Ginoo ang Iyang mga panalangin sa pagbasa sa Iyang mga Pulong. Karon ang hilisgotanan niining hapon mao ang: *Usa Ka Paradox*.

⁵⁰ Bueno, ang pulong nga *paradox*, sumala sa akong pagsusi niini ug aron makasigurado ako nga—nga husto ako, nagakahulogan ang pulong nga *paradox*, sumala sa Webster, nga kini’y “usa ka butang nga dili-katoohan, apan tinuod.” Karon, kabalo na mo, nadungog na nato ang karaang panultihon, nga—nga, “Ang kamatuoran labaw pa” (unsa gani ang tawag nila niadto?) “labaw pa ka talagsaon kay sa tinumotumo lang,” ingon niana ang kamatuoran. Tungod kay, ang usa ka tawo man gud pag nagasulti sa kamatuoran, usahay talagsaon kaayo kini.

51 Duna ko'y kaila nga akong higala, nga, didto sa Colorado. Nagpahigayon sila og pagsusi, susihon nila ang mga lagsaw'ng-elk. Ug adunay baynte-uno ka elk didto sa usa ka panon. Ug ang higala ko, niadtong higayona, nangayam man siya didto, ug miabot pud ang mga tigbantay. Ug nagbayad sila og daku-daku nga kantidad, didto sa konserbasyon, para makagamit niadtong mga sakyanan nga pang-niyebe, aron makaadto didto ug masusi ang mga lagsaw'ng-elk. Miingon ang akong higala, "Wala na unta mo nagbayad og ingon-ana ka daku nga kantidad sa kuwarta. Mahimo ko mang isulti kaninyo kung pila ka lagsaw'ng-elk ang atua didto." Ug gikataw-an lang nila siya. Miingon, "Pila man gyud?"

52 Miingon ang akong higala, "Dunay dise-nuebe." Ingon pa, "Baynte-uno man unta, pero napatay ko na man ang duha niadto."

53 Ug gikataw-an siya sa maong tigbantay. Usa ra man gud ang ginatugot nga mahimong pusilon didto, kabalo na mo. Ug miingon ang tigbantay, ingon niya, "Oo, kabalo man ko nga duna ka'y napusil."

54 "Bueno," miingon, "napusil ko bitaw. Adunay baynte-uno ka lagsaw'ng-elk kaniadto, ug duha ang akong napusil."

55 Ug mikatawa lang ang tigbantay ug miadto na didto. Ug aduna man gyu'y, dise-nuebe ka lagsaw'ng-elk didto. Kita n'yo?

56 Miatubang siya kanako, miingon, "Kita mo na, parson, bisan isulti mo pa ang kamatuoran, pero dili gihapon motoo ang mga tawo niini." Kita n'yo, bisan isulti mismo ang kamatuoran, mao nga tinuod gyud nga labaw pa kini ka talagsaon kay sa tinumotumo lang.

57 Ang Josue dinhi usa ka Basahon, sa tinuod lang, usa kini ka Basahon sa katubsanan, sa Daang Tugon. Ang Josue, hunahunaon nato kini nga ingon niana, nga Basahon sa katubsanan. Tungod kay, kining, katubsanan aduna ma'y duha ka bahin. Ang katubsanan, sa bisan asa, adunay duha ka bahin. Kini mao, ang "paggawas," ug "pagsulod." Nagkinahanglan ang katubsanan og duha ka bahin, "paggawas," "pagsulod."

58 Girepresentar ni Moises ang kasugoan nga mao'y nagpahigawas kanila sa Egipto, ug, samtang, girepresentar pud ni Josue ang grasya nga mao'y nagdala kanila pasulod sa yutang saad. Sa laing pagkasulti, nga, ang—ang kasugoan ug ang grasya duha ka managlahi nga aspeto sa sugo sa Dios. Kaniadto, ang kasugoan mao'y nagpahigawas kanila, si Moises, ug si Josue ang nagdala kanila pasulod.

59 Nagarepresentar usab kini og usa ka butang sa atong panahon. Karon nagarepresentar kini, maingon sa ilang pagpanaw kaniadto, gikan sa—sa Egipto paingon sa yutang saad, mao man usab kita sa atong paggawas gikan sa kalibutan sa Egipto, sa kagubot, aron sa atong pagpadulong paingon sa

Yutang saad. “Sa balay sa Akong Amahan adunay daghang puloy-anan; kon kini dili pa, moingon ba unta ako kaninyo,” Juan 14. Ang “paggawas,” og ang “pagsulod.”

⁶⁰ Ang kasugoan ang naghinungdan aron maamgo nato nga sayup kita, apan ang grasya ang nagapasaylo kanato. Wala’y paglaum sa kasugoan alang sa—sa katubsanan, tungod kay kini . . . ug aron matapos kini. Walay grasya niini, tungod kay ginatudlo lamang sa kasugoan nga usa ikaw ka makasasala, apan grasya ang nagasulti kanimo kung unsay paagi nga makalingkawas ka dinha. Ang kasugoan mao ang pulis nga magbalhog kanimo sa bilangoan, apan ang katubsanan Mao Ang miabot aron bayaran ang imong silot; ug mao nga “paggawas,” ug “pagsulod,” paingon sa grasya.

⁶¹ Ang Efeso. Karon atong makaplagaan ang mao gihapong butang, nga sa Daang Tugon, sa hunahuna ko kining Basahon ni Josue mao gyud ang misibo. Ang husto nga pulong niini, mao’y, ang Basahon sa Mga Taga-Efeso sa Daang Tugon. Ang Basahon sa Mga Taga-Efeso diha sa Daang Tugon, mao ang mahimong husto nga ipa-ngalan niining Basahon ni Josue, tungod kay haum gayud kini para niana.

⁶² Karon hingsayran nato nga si Josue nagrepresentar sa grasya, o usa ka halad-pasig-uli, nga dili mahimo nga molungtad sa mao rang higayon nga nagalungtad ang kasugoan.

⁶³ Mao usab ang unsa mang mensahe, nga ginapapadayon ang mga tawo, dili kini mahimong magdungan sa usa pa ka mensahe nga miagi na. Dili gyud kana magsilbi. Dinha kamo nagakaproblema sa karong panahon. Miingon si Jesus, “Puede bang mokuha ang si kinsa man nga tawo og—og bag-ong bisti ug igatapak kini ngadto sa daan? O isulod ang bag-ong bino diha sa mga daang sudlanan? Mangadaut kini. Kini mobusikad sa mga sudlanan.” Dili niini mapugngan kana.

⁶⁴ Ug si Josue dili usab mahimong magsugod sa iyang ministerio hangtud nga mitaliwan na si Moises. Busa makita n’yo ang pinaka unang bersekulo dinhi, “Si Moises nga Akong alagad patay na; karon bumangon ka ug dalha kining mga tawo paingon sa yutang saad.” Si Moises, nga nagrepresentar sa kasugoan, natapos na man ang iyang panahon. Buut ipasabot, nga ang kasugoan tapos na usab sa panahon niini.

⁶⁵ Sa tinuod lang, nagsugod man sila kaniadto, sa grasya, sa sugod pa lang. Sa wala pa sila nagkaaduna og kasugoan, aduna na sila og grasya. Samtang atua pa sila sa Egipto kaniadto, wala sila’y kasugoan; wala ni usa ka kasugoan didto, mga sacerdote lamang, ug uban pa, tungod wala sila nagkaaduna og unsa man nga kasugoan. Wala pa man nahatag ang kasugoan kaniadto. Grasya ang nagtagana kanila og usa ka propeta. Ug, usab, grasya ang nagtagana og pangbayad-sa-sala, ang hinalad nga cordero. Moabot ra kita dinha niining semanaha, mahitungod sa halad, sa

dugo, tungod kay anaa dinha ang inyong kaayohan. Busa sa . . . Nagtagana na og pangbayad-sa-sala sa wala pa nagkaaduna og unsa man nga kasugoan. Nauna na ang grasya sa wala pa ang kasugoan, sa panahon sa kasugoan, ug human sa kasugoan.

⁶⁶ Busa atua si Josue, nga nagrepresentar sa grasya, atua mismo nga kauban na sa kasugoan, apan dili pa mahimong maaplikar hangtud nga ang kasugoan anaa pa sa tukma nga bahin niini.

⁶⁷ Ug mao usab ang kalibutan sa iglesia niining kaulahiing adlaw! Kauban kini sa pagpanaw, nabuhat pud niini ang bahin niini, apan moabot ang panahon nga mahanaw ra kini. Mahitabo gyud kini. Siguradong adunay usa ka Mga Taga-Efeso, usab, sa niini nga panaw, maingon man sa uban pa nga mga pagpanaw kaniadto. Siguradong aduna gayu'y modangat nga Mga Taga-Efeso, usa ka Efeso, usa ka Taga-Efeso sa niini nga panaw. Matikdi.

⁶⁸ Tungod ang kasugoan dili man makaluwas sa makasasala, sumala sa gisulti ko na kaninyo. Dili gyud mahimo. Busa nagrepresentar ang yutang saad ingon nga adlaw sa grasya. Kita n'yo, wala man nahimo ni Moises kaniadto nga madala gyud sila pasulod, niadto nga pagpanaw.

⁶⁹ Ug kung inyong namatikdan, niadto nga pagpanaw, aduna sila'y tulo ka hugna sa ilang pagpanaw. Una mao ang pagpangandam pinaagi'g pagtoo, didto sa Egipto, ilalum sa hinalad nga cordero. Dayon mitabok sila sa Dagat nga Mapula, paingon sa—sa kamingawan, ingon nga usa ka paghimulag, nga nagrepresentar sa usa na usab ka hugna sa pagpanaw.

⁷⁰ Tungod kay, ilalum sa maong pagpangandam, kaniadtong andam na silang tanan, dayon sa dihang nahidangat na sila didto sa—didto sa Dagat nga Mapula, aduna na usab og pagkapakyas. Tungod ang mga tawo wala man mitoo, human nga ilang nasaksihan ang daghang mga butang nga gibuhat sa Dios. Wala gihapon sila mitoo. Ug gipabuka sa Dios ang Dagat nga Mapula ug gidala sila pasulod, diin gikatudloan kita nga ang tanang mga tawo didto kaniadto gibautismohan ngadto kang Moises, ilalum sa Panganod ug sa dagat.

⁷¹ Bueno gibautismohan sila, nanaghinulsol ug gibautismohan, ug nanggawas aron magpanaw paingon sa usa ka bag-ong kinabuhi, sa usa ka bag-ong yuta, sa usa ka bag-ong panaw, taliwala sa mga gibag-ong katawhan, ug nagapandong kanila ang kamot sa Dios. Apan sa katapusan miabot sa punto, sa ilang panaw kaniadto, nga wala na sila nangalipay sa ilang pagpanaw diha sa grasya. Miabot sila sa punto nga kinahanglan aduna gyud sila'y buhaton sa kaugalingon ra nila mismo.

⁷² Karon mao pud kana ang ginahunahuna sa mga tawo, sa karong panahon, mahitungod sa Balaanong pagpang-ayo, o sa unsa pa man nga buhat sa grasya, sa Dios, nga kinahanglan aduna ka kono og pagabuhaton usab. Kamo, wala ma'y

kinahanglan ninyong buhaton kondili ang magtoo lamang, magtoo lang sa Dios.

⁷³ Ug, sila, kung nagpadayon lang unta sila kaniadto! Wala man gikahatag kanila ang maong saad ilalum sa kasugoan. Gikahatag kanila ang saad sa wala pa ang kasugoan, nga walay bisan unsa man nga kondisyon niadto, “Ako nang gihatag kaninyo kini nga yuta, umadto ug sumulod kamo niini!” Apan sa wala pa sila nahidangat niadtong saad, nagdesisyon na sila nga kinahanglan aduna sab sila’y pagabuhaton.

⁷⁴ Ug, kana, makaplagan gihapon nato hangtud karon ang ingon niana sa taliwala sa mga tawo. Malagmit kita nga mamaingon niana, “Kinahanglan aduna kita’y pagabuhaton usab.” Hunahuna man gud nato, nga kinahanglan usab natong magbuhat og usa ka butang.

⁷⁵ Aduna bitaw kamo’y kinahanglan nga buhaton usab, kana mao ang inyong pagsurender sa kaugalingon n’yong kabubut-on, kaugalingon n’yong mga hunahuna, ngadto sa kabubut-on ug hunahuna sa Dios nga Makagagahum-sa-tanan, ug tapos na kana. Mao lang kana. Toohi lamang ang Iyang saad, ayaw na kamo paghunahuna og unsa pa man. Magkinabuhi pinaagi Niini, ug ang Dios na ang mamuhat sa uban pa.

⁷⁶ Bueno gitinguha nila kaniadto ang kasugoan. Ug sa kanunay ginahatag man kaninyo sa Dios ang tinguha sa inyong kasingkasing; gisaad Niya kana. Apan hingsayran nato, sa dihang mitipas sila og usa ra ka lakang pahilayo sa orihinal nga gikasaad kanila sa Dios, nan nahimo kadtong usa ka tunok sa unod hangtud nga giwagtang ang kasugoan, hangtud nga miabot si Jesus Cristo ug gilansang sa krus aron wagtangon ang kasugoan. Usa gyud kadto ka tunok sa unod.

⁷⁷ Ug bisan unsa mang butang nga ginatinguha mong buhaton sa kaugalingon mo lang mismo, sa kanunay maghinungdan kana og kaulawan kanimo. Maghinungdan kana og kadaut kanimo. Toohi lamang ang Dios, ug mao na kana. Nagsaad man ang Dios, “Ako ang Ginoo nga imong Dios Kinsa mao’y nagaayo sa tanan mong mga balatian.” Kita n’yo? “Kung adunay si kinsa man kaninyo, nga nagamasakiton, ipatawag kanila ang mga anciano sa iglesia.” Nagsaad pud Siya, “Ang mga buhat nga Iyang gibuhat, pagabuhaton usab diha sa Iyang iglesia.”

⁷⁸ Nganong dawaton pa man nato ang mga organisasyon, ug uban pa, nga mao’y magapapas niana gikan sa Basahon? Kita n’yo, kini—nagakahimo lang kini nga tunok sa unod. Ug dinhi sa katapusang panahon, atong natagbo pag-usab ang maong butang, sa nawong og nawong, diha sa mga Methodist, mga Baptist, mga Presbyterian, ug unsa pa man, kita n’yo. Kamo, dili kamo makapadayon dinha; kinahanglan n’yo gayud nga mobalik sa tibuok og bug-os nga Ebanghelyo. Gihimo Kini alang sa bug-os nga tawo, pinaagi sa usa ka bug-os nga Dios Nga

nahimong unod ug nagpuyo ipon kanato. Ug nasayod kita nga tinuod kining mga butanga.

⁷⁹ Karon kung mamatikdan nato, nga kaniadto, sa ilang pagpanaw didto sa kamingawan kon diin nahimo nila ang pinakadakung sayup nga nahimo sa Israel sukad-sukad, hangtud sa Kalbaryo, kaniadtong (diha sa Exodo 19) gidawat nila ang kasugoan imbis nga ang grasya. Nakabaton na sila og grasya kaniadto. Nakabaton na sila og propeta. Nakabaton sila—nakabaton sila og hinalad nga cordero. Nakabaton sila og katubsanan. Nakatabok na sila sa Dagat nga Mapula. Nangaayo sila sa ilang mga balatian. Nakabaton sila og tubig gikan sa hinampak nga bato. Nakabaton sila—nakabaton sila og manna gikan sa langit. Ang tanan-tanan nga gikinahanglan nila gikahatag mismo kanila, ug bisan pa niana nagtinguha gihapon sila og uban pang butang.

⁸⁰ Bueno usa kana ka hingpit nga tipo sa atong Mga Taga-Efeso niining panahona, eksakto gayud. Migawas kita gikan sa panahon ni Luther; miagi kita sa pagpabalaan, sa panahon sa Methodist; ug misulod sa pagpasig-uli, sa panahon sa Pentecostal. Eksaktong sama sa nahitabo kaniadto, didto sa pagpanaw sa kamingawan. Ug sa dihang gipahigawas na kita sa Dios, maayo pa kaayo kita. Apan unsa ma'y atong gibuhat? Gitinguha nato nga mamahimong sama sa tanang uban pa kanila. Karon hingsayran nato nga grasya lamang ang bugtong butang nga magadala kanato hangtud sa katapusan, og dili ang kasugoan.

⁸¹ Si Josue dinhi usa ka tipo sa pangkaulahi-ang-adlaw nga ministerio. Kita n'yo? Karon hinumdumi n'yo ang tulo ka hugna sa pagpanaw kaniadto. Natapos man ang tanan niadto, una ang kasugoan ug ang tanan-tanan natapos gayud, aron nga si Josue. . . Ug ang *Josue* mao ra nga pulong sama sa Jesus, “Jehova’ng-manluluwas,” nga mao’y nagdala kanila gikan sa ilang dapit nga awaaw pasulod ngadto sa yutang saad. Karon nasayod ko nga daghan ang nagatoo. . .

⁸² Ug ayaw ko unta nga mosupak sa mga eskolar, apan daghan man gud ang nanagtoo nga ang yutang saad kono nagrepresentar sa Langit. Dili kadto mahimong magrepresentar sa Langit. Dili gayud, tungod kay aduna man sila og mga gubat, ug mga kasamok, ug kalibog, ug tanan na, didto sa yutang saad kaniadto. Wala pud kadto nagarepresentar sa Yutang saad.

⁸³ Apan kon namatikdan ninyo, sa wala pa sila misulod sa yutang saad, ang tanan nga—nga mga panagkalahi nanungha na sa—sa taliwala nila. Sila. . . Ang usa sa mga grabeng pagkalahi mao si Korah. Ayaw niya niining pang-usa ra ka tawo nga kapangulohan. Si Dathan sab, ug miadto sila sa atubangan ni Moises ug naninguha sa pagsulti kaniya nga “*ingon-niini* ang—ang buut ipasabot sa mensahe,” ug gihatagan nila kadto og lahi

nga interpretasyon, og kaugalingon nilang mga ideya kung unsa kono kadto. Ug tanan sila nangamatay! Ang matag usa gayud!

Miingon si Jesus, “Wala ni usa man kanila ang wala namatay.”

⁸⁴ Miingon sila, “Ang among mga ginikanan nanagpangaon man og manna didto sa kamingawan, sulod sa kuwarenta ka tuig,” San Juan 6.

Miingon si Jesus, “Ug sila ang matag usa kanila nangamatay.”

⁸⁵ Ang *pagkamatay* nagakahulogan og “Walay Katapusan nga pagkahimulag.” Nangamatay gyud silang tanan, bisan pa nangalipay sila sa pagpatalinghug sa mensahe, bisan pa nanagpakaambit sila og manna nga nangahulog. Dili nga lahi nga manna; kondili tinuod gayud nga manna!

⁸⁶ Apan sa pag-abot sa punto kaniadtong mitungha na si Balaam nga dala ang iyang mini nga doktrina, ug miingon, “Usa ra man kitang tanan. Nganong dili na lang ’ta maghiusa ug tugotan ang atong mga anak nga managminyo sa usa’g usa? Usa man kami ka bantugan nga nasud. Himoon namo kamo nga dunay yanong espirituhanong panabot makakita gayud nianang mao gihapong butang bisan sa karong panahon, nga silang tanan nanagminyo. Ug usa kadto ka dili-mapasaylo nga sala. Wala gayud gipasaylo niadto ang Israel.

Apan niadtong panahona mitungha si Josue alang sa exodo.

⁸⁷ Bueno gikatudloan kita, diha sa Pinadayag sa ika-6 nga kapitulo, sa hunahuna ko, oo, sa ika-6 nga kapitulo, mahitungod sa Pito ka Selyo. Nga angay’ng... Naselyohan ang maong Basahon og pito ka misteryo, o Pito ka Selyo, Pinadayag 6. Ug sa kaulahiing adlaw, Pinadayag 10, sa Pinadayag 10, hingsayran nato nga sa Laodicea, ang ulahing mensahero sa kaulahiing kapanahonan, ug sa panahon sa iyang pagpropesiya, pagaablihan ang Pito ka Selyo, ang pito ka misteryo, pito-ka-pilo nga mga misteryo nga nabiyaan nga wala napadayag.

⁸⁸ Sa matag kapanahonan aduna man gud og pipila Niini nga nabiyaan nga wala pa napadayag. Tungod walay panahon ang repormador aron sa pagpahayag Niini. Sa mga adlaw ni Luther, nagwali lamang siya og pagpamatarung pinaagi sa pagtoo. Sa pagtaliwan niya, nagtukod sila og usa ka iglesia. Human niadto miabot si Wesley, nagwali siya og pagpabalaan. Mao kadto. Ug dayon miabot ang mga Pentecostal.

⁸⁹ Apan gikasaaran man kita, sumala sa Pinadayag 10, ug sumala sa Malaquias 4, ug sa San Lucas 22:17, ug uban pa, nga moabot gayud kining usa—usa ka Mga Taga-Efeso. Gikasaad na kini, mga higala. Aduna gayu’y moabot nga usa ka Mga Taga-Efeso, nga kining pito-ka-pilo nga mga misteryo sa Pulong sa

Dios kinahanglan mahipadayag. Ug dinhi sa kapanahonan sa Laodicea kini mamahitabo. Nagatoo ko nga kita—ania na kita nianang panahona.

⁹⁰ Nagatoo ko nga ania na mismo kita sa mga landong sa Pag-abot sa Anak sa Dios. Ug sama ni Josue, sa wala pa mitungha ang Mga Taga-Efeso kaniadto, mao man usab si Juan Baustista nga mitungha sa wala pa ang sunod nga Taga-Efeso. Ug gikasaaran kita og usa na usab, lahi nga Mga Taga-Efeso sa karon. Gikatagna na kini dinhi sa Kasulatan, busa nagatoo ako nga nagakinabuhi na kita sa Mga Taga-Efeso pag-usab. Balik pag-usab sa . . . Gikasaad na kanato ang maong butang nga nabiyaan kaniadto nga wala napadayag sa panahon niadtong pito ka kapanahonan.

⁹¹ Karon dili kamo puedeng magdugang og unsa man ngadto sa Basahon, o magtaktak og unsa man gikan Niini. Mao kana ang ginaingon sa Pinadayag 22:18, “Ang si kinsa man, nga magadugang og usa ka pulong, o magataktak og usa ka Pulong, pagataktakon ang iyang bahin gikan sa Basahon sa Kinabuhi.” Mao nga dili gayud kita puedeng magdugang o magtaktak man.

⁹² Busa hingsayran nato nga wala Kini nabatonan kaniadto ni Luther; ni Wesley, ug uban pa, nga mga repormador, sila Knox, Finney, Calvin, ug, uban pa, wala nila Kini nabatonan tanan, apan ang nabatonan nila kaniadto mao man gihapon ang Ebanghelyong Kamatuoran.

⁹³ Apan karon sa kaulahiing mga adlaw, gihatagan na kita og pagsabot, pinaagi sa Pulong, aron masabtan nato Kini, tungod kay modangat man kining kapanahonang Efeso dinhi. Ug ania na mismo kita! Karon, paradox! Mohunong usá ko dinha, tungod kay aduna na lang ko’y mga diyes minutos ug dayon ipahigayon na nato ang linya sa pagpaampo. Paradox!

⁹⁴ Adunay pipila ka mga tawo, sa karong panahon, nga wala nagatoo og mga milagro. Ginaingon nila nga dili gayud sila “makatoo nga aduna kono’y ingon-anang butang sama sa mga milagro sa niining moderno nga kapanahonan.” Bueno, wala ko ginatuyo nga magsulti og butang nga dili-maayo bahin sa ingon niana nga tawo, apan wala na gyud sila’y pagbati sa espirituwal. Sila, sila, sila’y—sila’y mga buta sa espirituwal. Wala sila’y espirituwal nga panan-aw o espirituwal nga pagbati, wala gayud. Tungod, wala ma’y tawo nga molingkod taliwala sa dakung panon sa katawhan, kon diin nagakunsad ang Balaang Espiritu, bisan pa kung ang maong lalaki bug-os gayud nga makasasala, o ang maong babaye, apan siguradong mabati man gyud nila ang Presensiya sa Dios, sa diha nga makita n’yo ang Pulong nga Iyang gisaad nagakatuman. Busa kung ingon niana wala gyud diay kamo’y pagbati; ug bisan nakita n’yo na kini sa inyo mismong mga mata, nga nagakahitabo, nan siguradong mga buta gyud kamo, sa espirituwal, dili sa pisikal ang akong

ginapasabot. Apan sigurado gayud nga mamahimo kamo nga buta sa espirituwal, ug bisan twenty-twenty, ang inyong pisikal nga panan-aw.

⁹⁵ Mahinumduman n'yo ba kaniadtong atua si Elias sa—sa Dothan, sa dihang miadto siya didto ug gibutahan niya kadtong tibuok kasundalohan? Miingon ang Biblia nga gibutahan niya sila. Ug gipangunahan niya sila mismo ngadto sa lit-ag, sa dihang wala nila mailhi kung kinsa siya. Ug siya ra man gihapon kadto sa ingon ka eksakto kung unsa mismo ang iyang hitsura, ug ingon niana, ug miadto pa siya mismo ngadto kanila. Apan mga buta man gud sila.

⁹⁶ Ug mamahimo kang mobarug diha sa Presensiya sa buhi nga Dios, mamahimo kang mobarug ilalum sa pagdihog sa Espiritu ug makita Kini nga nagapanglihok, ug dili gihapon ka matandog Niini. Mahimo nimong makita kung unsay gisulti sa Dios, nga giwali kanimo sa ingon ka eksakto ug dayon mapamatud-an kana, ug dili gihapon motuhop kanimo, “dili ako motoo Niana,” busa, kung ingon-ana, dili ka na gyud matabang pa. Patay ka na, wala na'y pagbati, gibutahan, og impas na. Kini'y bug-os man unta nga napamatud-an.

⁹⁷ Ang kalibutan. Nahunahuna ko, kung kanang mao ra nga tawo nga wala nagatoo og milagro, nahunahuna ko, kung ginaingon nila nga kini mao lamang kono ang mga butang nga mamahimong . . . nga ang tinuod, kadto lamang kono ang napamatud-an mismo sa siyensiya, aduna ba kaha'y siyentista, o si kinsa man nga wala nagatoo og milagro, ang makapasabot kanako kon giunsa niining kalibutana sa pagpabilin sa orbit niini. Giunsa kaha niini pagpabilin nga eksakto ang oras niini, palibot sa ekwador ug ang pagtuyok niini, nga ingon gayud ka eksakto? Wala gani kita'y makinarya, relo man, o unsa man, nga maipadayon nga perpekto ang oras nga ingon niana; ang atong oras nagausb-usb man og pila ka minuto kada bulan. Apan ang adlaw ingon gayud ka tukma sa oras niini. Liboan ka tuig man ang molabay, dili gyud kini nagakausb; sigurado gayud, ingon ka eksakto.

⁹⁸ Giunsa man sa bulan, nga binilyon ka milya ang kalay-on gikan sa kalibutan, nga mahimo niining kontrolon ang pagtaub-ug-pagahunas sa dagat. Sultihi n'yo ako kon giunsa niining kawanangan nga atong ginapuy-an, giunsa man sa bulan nga magkaaduna og epekto diha sa tubig sa kalibutan? Sa siyentipikanhong pamaagi, sultihi n'yo ako kon giunsa niini pagkahitabo. Dili kana mamahimo, tungod nga wala ma'y siyentipikanhong pamaagi aron sa pagsaysay niini. Apan gipahimutang sa Dios ang bulan aron bantayan ang dagat. Ug paghinay-hinay nang mobali sa pagtuyok ang bulan, pagmotuyok pud ang kalibutan, ania na usab ang pagtaub-ug-pagahunas sa dagat. Apan sa dihang momata na kini, pagkasunod buntag, motuyok na pud kini sa *ingon-ini* nga direksyon, og

mobalik na usab ang normal nga lebel sa dagat. Usa kini ka tigbantay.

“Oh,” moingon mo, “nagakahitabo lang man kana diha sa baybayon.” Dili.

⁹⁹ Dinhi mismo usab sa Arizona, hangtud didto sa estado sa Kentucky, pag magbangag ka sa yuta og igong kalawmon para makakaplag og maparat nga tubig. Imong makita, sa dihang mohunas na ang dagat, kadtong maparat nga tubig moubos pud sa tubo. Ug sa dihang motaub na ang dagat, motaas usab kadtong tubig, nga gatusan ka milya ang kalay-on gikan sa baybayon.

¹⁰⁰ Mahimo gani kitang magwali og usa ka sermon mahitungod niana. Kung unsa nga ang Dios, bisan pa, nga anaa Siya dinha sa Kahimayaan apan ang Iyang mga sugo mao ra gihapon og epekto sa tibuok kalibutan ug sa bisan kinsa nga modawat sa saad. Gikahatag na ang Iyang sugo. Aduna Siya’y mga balaod sa kinaiyahan, ug—ug kini sila—kini sila bug-os gayud nga nagakatuman, sukad pa kaniadto sa Pentecostes o sa ubang panahon. Sa unsa mang panahon nga ang Dios nagsaad, magapabilin gyud Siya niana nga saad bisan asa man napahimutang ang mga tawo, pila man ka libo ka tuig ang gidugayon. Ang Iyang kabalaoran usab nagapabilin nga mao ra sa gihapon.

¹⁰¹ Sama ra sa binhi nga mahulog sa yuta, ug madugta kini, ug aron motungha pag-usab ang kinabuhi. Mora’g, kung magpatungha kini og kinabuhi, mamahitabo man kon anaa kini sa hingpit nga kahimutang. Pero kung anaa na kini’y kinabuhi sa kinasuloran niini, nan nganong dili man kana basta-basta na lang mogitib dinha? Gikinahanglan pa man nga mailubong sa yuta, aron mogitib ang kinabuhi. Nganong ang tanan nga nakaputos niini nga kinabuhi, ang tanang nakaputos niini nga binhi walay si kinsa mang tawo ang makakita, nganong ang tanang materyal nga nakaputos niini nga binhi kinahanglan pa man uná nga mamatay? Aron mogitib ang bag-ong kinabuhi. Apan ang tanan-tanan nga nakaputos niini kinahanglan uná nga mamatay ug madugta, sa dili pa mahimong mogitib ang kinabuhi.

¹⁰² Mao man usab sa usa ka tawo. Hangtud nga aduna pa dinha og tawhanong mga opinyon, tawhanong mga ideya, nan ang binhi sa kinabuhi sa Dios, ang Balaang Espiritu, dili gyud makapamuhat. Dili ka mamaayo hangtud nga aduna pa og—og tipik nga bahin kon asa man, nga wala pa nadugta; aduna pa kanimo ang tanang elemento nga iya sa tawo, ang tanang siyentipikanhong mga ideya, ang tanang ingon-ingon nga “ang mga adlaw sa mga milagro milabay na,” kono. Kana tanan kinahanglan gayud, ang tanan-tanan, dili lang nga mamatay, kondili madugta usab, dayon dinha pa lamang motubo ang binhi

sa Kinabuhi ngadto sa usa ka bag-ong kinabuhi. Mao lang kana ang bugtong paagi para motubo kana.

¹⁰³ Mao kana'y hinungdan nga dili nato maangkon ang atong ginatinguha. Gapaningkamot man gud kita, nga atong iaplikar, ang ingon ka daghan nga kaugalingon natong mga ideya.

¹⁰⁴ Mao usab kana'y hinungdan nga ang iglesiang Lutheran dili na makapadayon pa kay sa ginabuhat niini kaniadto, ang mga Pentecostal usab ug uban pa; tungod kay nagpatudlo man sila, sa daghan nilang mga teologo og, "Dili *Kini* angay'ng ingon niini. Alang ra man *Kini* sa laing panahon. Ug *Kini* alang ra kono niana." Mao nga nagapabilin na lang kini nga ingon-ana. Dili na kini mahimong motubo ngadto sa hulagway ni Cristo hangtud nga ang matag Pulong sa Dios unta madawat gyud ninyo, ug dayon mamahimo na kamo nga Pulong. Sama ra kini sa binhi nga nailubong sa yuta.

¹⁰⁵ Gusto kong isaysay nila ang Mga Hebreohanon 11:3. Ang pinakabantugan nga siyentista nga nagkaaduna kita, kutob sa akong nahibaloan, mao si Einstein. Dinhi dili pa lang dugay, sa New York, naminaw ako sa kung unsay iyang gisulti. Ug naghigot siya kaniadto mahitungod sa kawanangan, ug kung unsa ka halapad kini, ug napamatud-an niya nga aduna gyu'y Eternidad. Kung sa unsang paagi nga ang tawo, nga magabiyaye og minilyon ka milyas kada oras, magkinahanglan pa kini og ingon ka daghan, o usa ka milyon nga light years kada oras, mao nga magkinahanglan gyud siya og daghan kaayo nga katuigan aron nga makadangat didto, usa, tulo ka gatus ka libo o mora'g ingon niana, ug dayon tulo ka gatus ka libo na usab para makabalik. Ug dayon iyang napamatud-an pinaagi niadto, sa kung unsa mang paagi, nga ang tawo kono aduna na lang og singkwenta ka tuig sa iyang kinabuhi pagmobiyaye man siya gikan sa yuta. Eternidad!

¹⁰⁶ Ug usa lang kana ka diyutay'ng kawanangan, kaniadtong gihuyop kana sa Dios gikan sa Iyang kamot! Mao'y giingon sa Biblia! Ug sa katapusan nagsulti si Einstein niini, "Aduna lamang og usa ka paagi nga mahimong isaysay ni kinsa man nga tawo ang sinugdanan niining kalibutan, makaplagan kana diha sa Mga Hebreohanon 11:3. 'Hingsabtan nato nga ang mga kalibutan gibuhat pinaagi sa Pulong sa Dios.'" Eksakto gayud kana. Dili gani kini matugkad sa siyensiya. Ug dayon moingon mo nga wala mo nagatoo og milagro? Giunsa n'yo man pagkahimong dili motoo niini?

¹⁰⁷ Unsaon man pagsaysay ni kinsa mang siyentista ang ulan sa panahon ni Noe kaniadto, sa dihang wala pa man sukad nagkaaduna og tinulo sa ulan nga nahulog sa yuta hangtud niadtong panahona? Apan miingon si Noe nga magkaaduna gyud og ulan! Ug sa dihang miabot na ang ulan ni Noe, nga sukwahi sa tanang siyensiya, wala man gud og mga panganod didto sa itaas,

wala pa gayud sukad-sukad nagkaaduna, og ulan didto, ngani mapamatud-an man nila nga wala gyu'y ulan didto sa itaas, ug dayon sa dihang giablihan sa Dios ang kalangitan ug gibubo ang—ang makusog nga bul-og sa tubig nga mibanlas sa tibuok kalibutan, usa kadto ka paradox; tungod nga bug-os kadtong dili-katoohan, dili-masaysay.

¹⁰⁸ Apan nasayod kita nga gibuhat kadto sa Dios, tungod kay mao kana ang giingon sa Biblia. Ug aduna kita'y kapanghimatuoran dinhi sa yuta, sa karon, nga nahitabo gyud kadto. Gibuhat kadto sa Dios. Usa kadto ka paradox.

¹⁰⁹ Sa dihang nagpili ang Dios og usa ka tigulang nga lalaki kaniadto, nga ginganlan og Abraham (sa edad nga setenta'y-singko anyos, ug ang iyang asawa, saisenta'y-singko anyos, daghan nang mga tuig nga lagpas na sa panahon sa kinabuhi, sa pag-menopos), ug sa dihang gipili sa Dios kadto nga tawo ug gisaaran siya (sa edad nga setenta'y-singko anyos, uban niining babaye nga iyang giminyoan, nga iyang—igsoon niya sa amahan, ug nagpuyo siya uban kaniya niadtong batang babaye pa kini, tingali'g nagminyo sila kaniadtong ang babaye usa—usa ka batan-ong babaye pa lamang, ug atua kini nga saisenta'y-singko anyos na) ug giingnan, “Makabaton ikaw og og usa ka bata pinaagi niini nga babaye,” ug unsa kaha kung miingon si Abraham, “Ako—ako—wala man ko nagatoo og mga paradox, ako—dili ko gayud madawat kana”? Dili gyud unta kadto mahitabo.

¹¹⁰ Apan, nakita n'yo, kon moingon mo nga nagatoo kamo sa unsa mang butang, nan kinahanglan ipakita n'yo mismo kini diha sa buhat. Pagkahuman niadto gimandoan si Abraham nga ihimulag niya ang iyang kaugalingon gikan sa tanang dili-pagtoo, ug maglakaw lamang kauban sa Dios. Pero imbis nga nagakaluya, mas nagmalig-on hinoon siya. Ug sa dihang siya'y usa ka gatus anyos na, ug nubenta anyos na si Sarah, nahimugso gyud ang maong bata.

¹¹¹ Giunsa kaha pagdala ni Abraham ang iyang anak, kaniadto sulod sa tulo-ka-adlaw nga pagpanaw, tingali'g nubenta ka milyas ang gilay-on gikan sa unsa mang sibilisasyon, didto ibabaw sa bukid kon diin gipakita kaniya sa Ginoo, aron ihalad ang kaugalingon niyang anak, nga si Isaac? Si Isaac pa gani ang gipapas-an og kahoy kaniadto, sumala sa atong nasayran, nga mao'y tipo ni Cristo. Ug sa ibabaw niadtong bukid igahalad niya si Isaac ingon nga halad, ug sa dihang nabuhat na niya ang tanan nga gisulti sa Dios kaniya gawas sa pagduslak sa mismo niyang anak diha sa liog niini, hangtud nga mamatay, sa dihang gihulbot na niya ang punyal gikan sa sakuban niini ug gipataas ang iyang kamot aron sundon ang Dios, sa mismong sugo! Kay miingon ang Biblia, nga, “Nasayod si Abraham nga dili mahimong magsaad ang Dios kung dili Niya kini pagatumanon. Ug iyang nadawat si Isaac kaniadto ingon nga gikan sa mga

patay, nga arang sa Dios nga banhawon si Isaac gikan sa mga patay ug ihatag siya ngadto kaniya pag-usab.”

¹¹² Ug sa dihang andam na siya nga sundon ang Dios, sa bug-os gayud, gipugngan sa Dios ang iyang kamot ug miingon, “Pugngi ang imong kamot, Abraham.” Ug dihay usa ka laking-karnero nga nasangit didto sa kamingawan, nasangit ang mga sungay niini, sa mga punoan, didto sa ibabaw niadtong bukid, kon diin aduna usab didto og mga leon, mga lobo, mga hyena, mga ihalas nga iro, ug dagkung mabangis nga mga mananap nga nagakaon og karnero. Ug atua mismo kadtong maong karnero ibabaw sa bukid diin wala gayu’y tubig. Giunsa man pagkadtang niadtong laking-karnero didto? Namunit pa gani og mga bato si Abraham sa palibot didto, aron magbuhat og usa—usa ka halaran. Apan atua ang laking-karnero, bisan pa man. Usa kadto ka paradox.

¹¹³ Ug ang si kinsa mang tawo nga nagatoo sa Dios ug nagatoo Kaniya sa Iyang Pulong, bisan unsa pa ang kahimtang, magbuhat gayud ang Dios og usa na usab ka paradox, aron tumanon ang Iyang Pulong. Mao nga, gitawag ni Abraham ang maong dapit nga *Jehovah-jireh*, “nagtagana ang Ginoo og usa ka halad alang sa Iyang Kaugalingon.” Hangtud karon mahimo gihapon Niyang magpahitabo og usa ka paradox. Mahimo Niya kana niining hapon, kung toohan n’yo lang Siya sa Iyang Pulong.

¹¹⁴ Si Daniel, nga atua kaniadto sa usa ka langub nga puno sa gipanggutom nga mga leon, giunsa man pagkahitabo nga kadtong maong lalaki. . . Giunsa man pagkahitabo nga kadto nga lalaki, nga anaa sa taliwala sa usa ka pundok sa gipanggutom nga mga leon, nakapabilin man sulod sa langub uban niadtong mga leon, sa tibuok gabii, nga wala’y nahitabo kaniya? Tungod ang Manulonda sa Ginoo, nga dili-makita ni bisan kinsa pa man, atua man gud didto. Usa kadto ka paradox. Ingon nga may sa kung unsang butang nga nagpugong sa mga leon nga atakihon siya.

¹¹⁵ Sa dihang ang Hebreohanong mga anak gibalhog kaniadto sa nagdilaab nga hudno, sukwahi sab kadto sa tanang siyentipikanhong panabot, niadtong bantugan nga kapanahonan. Bug-os gyud ka dili-siyentipiko nga ang usa ka tawong gibalhog sa hudno, ingon nga, ang mga kalalaken-an gani nga nagdala kanila didto nangamatay, ug bisan nabalhog sila ngadto sa hudno ug buhi gihapon sila sulod sa hudno niadtong panahona, ug ang butang lang nga nahitabo didto mao’y nabadbad kanila ang ilang mga gapus. Usa kadto ka paradox. Dili kadto masaysay, dili-katoohan, apan bisan pa man kadto’y kamatuoran.

¹¹⁶ Ania si Josue, nga atong ginahisgotan. Giunsa man niini nga tawo, ingon nga usa lamang ka ordinaryong tawo nga bag-o pa

lang nakalingkaw sa—sa—sa pundok sa mga kredo nga hinimo sa mga tawo kaniadto, ug sa mga balaod ug mga seremonya, nga walay unsa mang gihisgotan mahitungod sa paghatag og gahum sa tawo aron pahunongon ang adlaw. Apan, adunay sugo gikan sa Dios, “Igahatag Ko kaninyo ang matag luna sa yuta nga pagatumban sa lapalapa sa inyong tiil. Maatua Ako didto.” Ug nabuntog ang mga kaaway.

¹¹⁷ Pasalop na niadto ang adlaw. Kung ang mga hari kaniadto magkaaduna pa og higayon aron matigum nila ang ilang kaugalingon pag-usab sa sunod nga adlaw, nan siguradong mamatyan gyud si Josue og mga sundalo. Apan nasayod si Josue nga nagkinahanglan siya og kahayag sa adlaw. Ug mihangad siya sa adlaw, ug miingon, “Humunong ka sa Gabaon. Ug, bulan, humunong ka dinha sa Ajalon.” Ug sulod sa tibuok adlaw, sa tibuok gabii kaniadto, mihunong ang adlaw ug mihunong pud ang bulan didto. Usa kadto ka paradox. Ang usa ka tawo nga nagalakaw mismo sa kabubut-on sa Dios makabuhat gyud og ingon niadtong butang, kay siya anaa man sa . . . anaa na usab siya sa usa—usa ka Efeso, sa usa—usa ka Taga-Efeso sa—sa Ebanghelyo. Oo, usa kadto ka paradox.

¹¹⁸ Si Moises nga dala ang usa ka sungkod sa iyang kamot, sa pag-adto niya didto ug aron ipahigawas ang mga anak sa Israel, usa pud kadto ka paradox, tungod kay atua man kaniadto sa Egipto ang tanang kasundalohan ug binansay mismong mga sundalo. Usa kadto ka paradox.

¹¹⁹ Ang ulay nga pagkahimugso usa pud ka paradox. Mahimo ba diay sa usa ka ulay, ingon nga sukwahi sa tanang siyentipikanhong panabot, nga ang usa ka babaye nga walay pagpakighilwas sa usa ka lalaki, mahimong manganak; ug dili pa gyud basta-basta lang nga anak, kondili si Emmanuel mismo, Nga eksaktong napamatud-an na og gikaingon na nga mamahitabo. Giunsa man niadto pagkahitabo? Usa kadto ka paradox. Tungod kay, nakigsulti na man ang Dios ngadto sa Iyang propeta, gatusan ka mga katuigan sa wala pa kadto, ug misunod ang maong propeta sa Pulong sa Dios, ug gilitok ang Pulong. “Ug ang Pulong nahimong unod ug nagpuyo ipon kanato.” Ug nagatoo kita niana. Walay pagduhaduha, usa kadto ka paradox.

¹²⁰ Kung giunsa Niya kaniadto paglakaw ibabaw sa tubig, usa pud kadto ka paradox. Ang usa ka tawo, nga ingon niana lang ang kadak-on sa mga tiil, dili gyud makahimo niadto. Apan nabuhat Niya. Unsa man kadto? Dili-masaysay, pero usa kadto ka paradox. Gibuhat kadto sa Dios. Nagatoo kita niana.

¹²¹ Ang pakan-on ang lima ka libo ka tawo, gamit ang duha lang ka isda ug lima ka tinapay? Apan nabuhat gyud Niya. Dili basta-basta lang nga isda ang gipadaghan, kondili luto na nga isda; dili basta-basta lang nga tinapay, kondili luto na nga tinapay.

Giunsa man Niya paghimong bino ang tubig? Ang tanan niadto paradox gayud!

¹²² Giayo Niya ang mga masakiton, nga dunay sanla, nga wala gani sila'y bisan unsa, ang siyensiya mismo, hangtud niining panahona, nga makapaayo sa sanla, apan giayo kadto ni Jesus pinaagi sa Iyang Pulong. Usa kadto ka paradox.

¹²³ Ug Siya mao sa gihapon kagahapon, karon, ug hangtud sa kahangturan. Ang Iyang Pulong nagaayo gihapon sa mga may sakit. Usa kini ka paradox, sigurado gayud.

¹²⁴ Gibanhaw pud Niya ang mga patay, human nga mitaliwan na ang mortal nga kinabuhi diha kanila; si Lazarus, og ang anak nga lalaki sa babaye didto sa Nain, ug ang anak nga babaye usab ni Jairo. Gibanhaw Niya ang mga patay, pinaagi sa Iyang Pulong, tungod kay Siya man mao ang Pulong.

¹²⁵ Ug ang usa pa ka dakung butang, sa pagtapos, aron pamatud-an nga Siya mao ang Mesias. Aron pamatud-an kung unsa Siya, mianhi Siya sa kahan-ayan, ug ingon nga katubagan, sa Pulong. Ug miingon ang Pulong, sa dihang nakigsulti Siya sa propeta, “Ang Ginoo nga imong Dios magpatindog og usa ka Propeta nga sama kanako.”

¹²⁶ Daghang mga kalalaken-an ang nanungha kaniadto. Ug dugay nga panahon, sulod sa gatusan ug gatusan ka mga katuigan, nga wala sila nagkaaduna og propeta. Oh, aduna sila kaniadto og mga sacerdote ug halangdong mga tawo, ug sumala sa atong mabasa sa kasaysayan tali sa panahon ni Malaquias ug ni Mateo, upat ka gatus ka tuig kaniadto, nga nagkaaduna sila og halangdong mga tawo. Apan wala gayu'y propeta.

¹²⁷ Ug dayon sa pag-abot na Niya sa esena, aron pamatud-an nga Siya mao ang Mga Taga-Efeso nga napadayag, gimantala kadto ni Juan. Apan si Jesus gayud Kadto, Siya mao ang Pulong nga napadayag, Mismo.

¹²⁸ Sa dihang miduol si Pedro ngadto Kaniya usa niadto ka adlaw, uban si Andres, Simon pa ang iyang ngalan kaniadto. Ug sa nagatindog si Jesus didto, nga wala pa sukad-sukad nakita ang maong lalaki sa tibuok Niyang kinabuhi, (paminaw og ayo) sa pagtindog Niya didto ug nakita ang lalaki, ug miingon, “Ang imong ngalan mao si Simon, ug anak ka ni Jonas.” Usa kadto ka paradox. Oo. Usa gayud ka paradox.

¹²⁹ Ug si Felipe, nga atua pud didto, sa pagkadungog niya niini ug naila ang tanang kailhanan nga mao na kadto ang Mesias, wala siya'y pagduhaduha. Gitooan gyud niya kadto. Dili man gud siya ingon nga walay pagbati, dili pud siya buta. Midalagan siya didto sa pangpang, nga pipila pud ka milya, ug gidala ang iyang higala, nga ginganlan og Natanael. Ug sa pagduol na sa maong higala . . . Grabe ang pagtoo ni Felipe kaniadto, nga nakadala siya og usa pa ngadto sa panagtigum, aron makasaksi usab!

130 Sa nakaduol na si Natanael didto sa atubangan ni Jesus, miingon si Jesus, “Tan-awa, ang usa ka Israelinhon, nga kaniya walay limbong.”

131 Nangangha niadto ang maong lalaki. Ingon niya, “Kanus-a Mo man ako hiilhi?” Karon matikdi, mora’g dili kini masabtan. Kini’y—dili kini arang maisaysay. Ingon niya, “Giunsa Mo man pagkaila kanako?”

132 Miingon, “Sa wala ka pa gitawag ni Felipe, sa didto ka pa ilalum sa kahoy, nakita Ko na ikaw.” Usa gyud ka paradox!

133 Ngani gikinahanglan ni Jesus nga moagi sa Samaria kaniadto. Ug sa pag-agi Niya didto sa Samaria, sa usa ka lungsod sa Sicar, milingkod Siya didto samtang nagahulat sa Iyang mga tinun-an nga nanglakaw aron mopalit og pagkaon. Ug, matikdi, dunay usa ka babaye nga miadto sa atabay, nga mahugaw’g dungog. Ug giingnan Niya ang maong babaye, “Babaye, lakaw ug kuhai Ako og mainom, o hatagi Ako og mainom.”

134 Ug miingon ang babaye, “Dili baya nabatasan para Kanimo nga mohangyo niana. Kita’y, usa man ako ka Judio. . . o usa ako ka Samarianhon, ug usa Ikaw ka Judio. Wala—wala man kami’y pagpakigharong Kanimo.”

135 Miingon Siya, “Apan kung nasayod ka lang kung Kinsa ang imong gikaestorya!” Matikdi n’yo kining paradox nga andam nang mahitabo. Ayaw n’yo kini pakyasa. Miingon, “Giunsa—giunsa Mo man paghimo, nga mosulti niini? Ako, usa man ako ka babaye nga taga-Samaria, ug usa pud Ikaw ka Judio. Wala baya kita’y pagpakigharong.”

136 Miingon Siya, “Apan kung nasayod ka lang kung Kinsa ang imong gikaestorya, o kung Kinsa ang nagapakig-estorya kanimo, ikaw—mangayo ka gayud Kanako og mainom.” Ug nagpadayon lang Siya hangtud nga hingsayran Niya kung unsay problema sa maong babaye. Ug miingon Siya, “Lakaw ug kuhaa ang imong bana ug balik dinhi.”

Ug miingon ang babaye, “Wala man ko’y bana.”

137 Miingon Siya, “Tinuod kana. Wala bitaw ka’y bana, tungod kay nagkaaduna ka na og lima, ug ang usa nga gikaipon mo karon dili man imong bana. Busa, tinuod ang imong giingon.”

138 Miingon ang babaye, “Sir, naila ko nga Ikaw usa ka propeta.” Wala man gud sila’y nakita ni usa ka propeta sulod sa gatusan na ka mga tuig. Miingon, “Nasayod kami nga ang—ang Mesias moabot, ug, pagmoabot na Siya, isulti Niya kanamo ang ingon niining mga butang.”

Miingon Siya, “Ako mao Siya.”

139 [Blangko nga bahin sa teyp—Ed.] Usa kadto ka paradox nga gipanghimatud-an, ug hingsayran ingon nga Ebanghelyong Kamatuoran; usa ka Ebanghelyo nga nagsaad niadto, ug ania nahitabo kini ug gipanghimatud-an kung unsa gyud kini.

¹⁴⁰ Karon hatagan ko kamo dinhi og usa ka halangdon og bililhong paradox, sa makadiyut. Diha sa Juan 14:12, miingon si Jesus, og nagsaad nga, “Ang magtotoo nga mitoo Kaniya, pagabuhaton usab ang mao gihapon nga mga buhat.” Husto ba kana? Ang Dios, Nga nagahimo og kasugoan o usa ka saad, kinahanglan tumanon gayud kana nga saad, aron mamahimong Dios. Ginatuman gyud Niya kana. Ang hunahunaon, nga ang Dios. . . .Aba, usa Kini ka paradox, Mismo; kay ang Dios, Nga maoy nagsaad dili makahimo nga pakyason kana nga saad, kondili pagatumanon gyud kana nga saad mahitungod sa mga butang nga Iyang gibuhay, ngadto sa Iyang katawhan, og magapadayon sa tanang kapanahonan hangtud nga mobalik Siya pag-usab. “Panglakaw kamo sa tibuok kalibutan, iwali ang Maayong Balita sa tanang binuhay; sa tanang binuhay, sa tibuok kalibutan. Ang nagatoo ug nabautismohan maluwas, ug ang dili nagatoo pagahukman sa silot; ug kini nga mga ilhanan maganunot kanila nga nagatoo.” Kinahanglan gyud Niyang tumanon kana nga Pulong. Ug tungod kay gisulti man Niya kini, migula kini sa Iyang baba, nan siguradong mamatuman kini.

¹⁴¹ Ang tanang Kasulatan kinahanglan mamatuman gayud. Busa usa ka paradox, mismo, nga madungog si Jesus, ang Anak sa Dios, nga mohimo og ingon niini nga pahayag, “Ang mga butang nga Akong ginabuhay pagabuhaton usab ninyo.” Karon miingon ang Biblia, diha sa Mga Hebreohanon 13:8, “Siya mao sa gihapon kagahapon, karon, ug hangtud sa kahangturan.” Usa kana ka paradox, tungod kay kinahanglan mamahitabo gyud kana. “Ang mga langit ug yuta mangahanaw, apan wala gayud ni usa ka Pulong nga Akong gisulti ang mapakyas,” miingon Siya. Kinahanglan mamatuman gayud.

¹⁴² Karon, mga higala, nagatoo ako nga Siya mao sa gihapon kagahapon, karon, ug hangtud sa kahangturan. Nagatoo ko nga may kasarang gayud Siya niining hapon nga magpahitabo, sulod niini nga bilding, og usa ka paradox, tungod kay gisaad man Niya kini nga mamahitabo.

¹⁴³ Ug unsa pa kaha nga Iyang gikasaad, nga ginapahinungod gayud diha sa Biblia, alang niini mismong kapanahonan nga atong gikinabuhian, ang Mga Taga-Efeso pag-usab, sa mga kapanahonan sa iglesia. Aduna man kita’y pito ka kapanahonan sa iglesia, ug gikasaaran kita nga sa Kapanahonan sa Iglesiang Laodicea magkaaduna og usa na usab ka Efeso. Husto kana. Ug ania na gyud kita. Nagatoo ko, sa tibuok kong kasingkasing, nga si Jesus Cristo Nga nagsaad. . . .

¹⁴⁴ Sumala sa ako nang gikaingon sa ulahi kong mensahe, nga anaa dinha sa may bungbong, niadtong ania ako dinhi pipila na ka semana ang milabay. Sa matag higayon nga ilihok mo ang imong tudlo, nagalibot-libot kana sa tibuok kalibutan, nga walay-paghunong. Ang matag lihok ninyo, makita n’yo kana didto sa Paghukom. Napamatud-an kana sa telebisyon nga ania

dinhi, sa ikaupat nga dimensyon. Tungod kay, ang telebisyon dili man makahimo og hulagway, ginapaagi lang niini ang sibya ngadto sa usa ka tubong-telebisyon, ug mao nga makakita mo og hulagway. Ang kolor, ang tanan-tanan, ang tanang butang nga nagakahitabo sa kalibutan, ang nagakahitabo dinhi mismo karon, nakarekord kini. Sa umaabot nga adlaw, pagatapuson na ang inyong rekord, ug panubagon ninyo kana nga rekord. Husto kana.

¹⁴⁵ Dios, itugot nga mamahimo akong mahitakdo gayud, itugot nga mamahimo akong patay na gayud sa akong kaugalingon ug sa unsa mang butang sa akong palibot, apan mamahimong masayod mismo sa Pulong sa Dios nga buhi sa among taliwala karon!

Mag-ampo kita.

¹⁴⁶ Ginoong Jesus, usa gyud Ikaw ka paradox, sa dihang ang Dios nahimong unod. Nagaampo ako, Langitnong Amahan, nga igapadayag Mo ang Imong Kaugalingon niining hapon, og pamatud-an nganhi kanamo dinhi karon. Dili lamang nga pamatud-an nganhi kanamo. . . Aduna, sa hunahuna ko, og nubenta porsyento, o sobra pa, nga mga tawong ania dinhi, ang nagatoo, sa matag Pulong. Apan ang makita Ikaw namo pag-usab, ug masayran kining Pulong nga Imong gisulti, nga padayong nagalibot ug nagalibot sa tibuok kalibutan, maingon sa usa ka pag-rekord, itugot nga makasulod kami niana nga pag-rekord, karon, Ginoo. Itugot nga makasulod kami ug dili lang nga madungog kini ingon nga nagagikan sa uban, gikan sa baba sa tawo; kondili itugot nga ang maong baba, ug ang maong tawo ug ang mga tawo, ang tanan nga ania dinhi, mamahimo unta nga Imong Pulong. Andam kami nga mamatay, Ginoo, sa kaugalingon namong mga ideya, aron makita Ka gayud namo nga ginatuman ang Imong saad, “Ang mga butang nga Akong ginabuhat pagabuhaton usab ninyo.” Nagaampo ako nga itugot Mo kini sa Ngalan ni Jesus. Amen.

¹⁴⁷ Sa dili pa kita magtawag para sa linya sa pagpaampo. Nagakaon ako og diyutay’ng sorbete usa niadto ka adlaw, uban ang usa ka dugay ko na nga doktor nga akong higala. Ingon siya, “Aduna ko’y gustong ipangutana kanimo, Billy.”

Ingon pud ko, “Okey.”

¹⁴⁸ Miingon, “Nagatoo ka ba sa . . .” Dinha ko nakuha kining ideya nga, *paradox*. Miingon, “Nagatoo ka ba sa usa ka paradox?”

Ingon ko, “Oo.”

¹⁴⁹ Miingon siya, “Ako—kabalo man ko nga nagatoo ka.” May gisulti siya, gisultihan niya ako mahitungod sa usa ka tawo nga naayo, og naiampo kaniadto; nga iyang gibaligyaan og mga tambal para sa patol, sulod sa pila ka tuig, usahay kono atakihon og makapito o makawalo ka higayon sa usa ka adlaw; mao

nga grabe pud ang mga tambal niadto. Ug ingon siya, “Wala na baya sila mibalik pa. Ug makita ko sila pirmi; wala na gyud giataki ang maong tawo.” Miingon, “Aduna ko’y gustong isulti kanimo, aron ipahibalo kanimo nga ako—nagatoo gyud ako nianang imong ginasulti.”

¹⁵⁰ Miingon siya, “Kaniadtong panahon sa pagkunhod sa ekonomiya, ang anak kong lalaki ang nagabantay kaniadto sa botika.” Miingon, “Siya’y—duna siya’y giabi-abi niadto, nga batan-ong lalaki, og miingon nga iyang . . . Nagalinya sila niadto, para sa tambal.” Ug miingon, “May usa ka lalaki nga miduol didto, ug kauban niini ang iyang asawa,” miingon, “usa ka luoy’ng babaye, siya’y . . . Makita mo sa maong babaye ug mamatikdan nga hapit na niyang igaanak sa unsa mang orasa, ang usa ka bata.” Ug miingon, “Dili na gyud kono niya maagwanta pa nga mopabilin pa didto sa linya, busa gidala sa maong lalaki—lalaki ang iyang asawa ngadto sa may pultahan, ug misandig kini sa iyang abaga.”

¹⁵¹ Ug miingon, “Miduol didto ang anak kong lalaki, miingon, ‘Mahimo ko ba kamong tabangan?’ Mitubag, ‘Oo,’ miingon, ‘ania ang reseta nga gikan sa doktor. Apan,’ miingon, ‘Buut ko uná nga klarohon kanimo.’ Miingon, ‘Ako . . . wala pa man gud kami’y kuwarta.’ Miingon, ‘Kuhaon pa lang namo ang kuwarta gikan didto sa lungsod, apan dili na man gud makaya sa akong asawa. Ang ingon sa doktor nga kinahanglan na kono niyang mainom ang tambal sa gilayon.’ Ug miingon, ‘Kung mahimo unta nga imo lang usá siyang hatagan og tambal, moadto ko dayon didto ug molinya inig akong—makuha ko na ang kuwarta gikan didto sa lungsod.’

¹⁵² “Ug miingon ang anak kong lalaki, ‘Sir, pasensya na.’ Miingon, ‘Supak man gud kana sa among—among mga patakaran dinhi, nga maghatag og tambal nga wala pa’y kuwarta nga gibayad.’ Kabalo na man mo kung unsa ang kahimtang niadtong mga panahona. Ug miingon, ‘Ako—naluoy man ko kaniya, pero dili ko man gayud mahimo kana.’”

¹⁵³ Miingon, “Naglingkod ako kaniadto samtang nagabasa og mantalaan. Ug mitan-aw ako, ug,” miingon, “may sa kung unsang butang nga nagpadilaab sa akong kasingkasing.” Miingon, “Miduol ako didto, ingon ko, ‘Kadali lang, dong, kadali lang.’ Mogawas na unta kaniadto sa pultahan ang maong lalaki, nga miingon siya, ‘Sige, okey lang, dong,’ mogawas na unta sa pultahan.” Ug miingon, “Ingon ko, ‘Kadali lang,’ miingon, ‘unsa diay naa?’ Miingon ang anak ko, ‘Bueno, kining lalaki man gud . . .’ Gipasabot kadto sa iyang anak kaniya.”

¹⁵⁴ Miingon siya, “Patan-aw sa reseta.’ Miingon, ‘Kadali lang, brad, hatagan ta ka og tambal.’”

¹⁵⁵ Miingon, “Miadto ako sa luyo ug giandam na ang reseta nga gisulat sa doktor sa maong papel.” Ug miingon, “Miduol ako

didto ug gihatag ang kantidad niadto,” siya miingon, “gitunol ko kadto kaniya, nga wala nahibalo kon mabayran ba ako niadto o dili, apan nahunahuna ko lang nga buhaton ko kadto.” Miingon, “Nabati ko gayud nga kinahanglan kong buhaton kadto.” Ug miingon, “Billy, sa dihang gitunol ko na kadtong—kadtong tambal ngadto sa kamot sa maong babaye,” miingon, “ang Ginoong Jesus man diay kadto.” Miingon, “Duna ko’y nakita nga usa ka Lalaki nga nagtindog didto.” Ug ingon pa siya, “Akong nabasa pagkahuman niadto, ang giingon sa Kasulatan, ‘Sa pagkaagi nga gibuhath ninyo kini ngadto niining labing mga gagmay, nga Akong mga gagmay, gibuhath ninyo kini Kanako.’” Miingon siya, “Billy, unsa kaha ang nahitabo sa akong mga mata? Nakita ko ba gayud kadto?”

¹⁵⁶ Miingon ko, “Oo, sir. Nagatoo ako. Nagatoo ko nga nabuhath mo gayud ang imong katungdanan ingon nga usa ka tigbaligya og mga tambal, niadtong grabe nga kahimtang nga gikinahanglan matabangan dayon. Ngani miingon si Jesus, ‘Kung unsa man ang inyong gibuhath ngadto niining uban pa, gibuhath ninyo Kanako.’ Nagatoo ako niana.”

¹⁵⁷ Ug nagatoo ako nianang mao gihapong butang, dinhi mismo karon sa taliwala niining mga tawo, nga mahimo ni Jesus Cristo nga ipadayag ang Iyang Kaugalingon, nga himoon ang Iyang Kaugalingon nga mao ang Pulong nga nahimong unod sa taliwala kanato niining hapona. Motoo ba kamo niini? Panalanginan kamo sa Ginoo.

¹⁵⁸ Karon magtawag na kita og mga prayer kard, aron moduol na ang mga tawo. Ug dili kita mahimong magtawag og daghan kaayo, tungod kay sa hunahuna ko karon, kung husto ang tan-aw ko sa orasan, aduna na lang ko’y baynte-singko minutos hangtud nga matapos kita sa alas kuwatro, sa gikatakda nga oras, apan magpadayon lang kita. Karon magsugod kita sa prayer kard, A man siguro. Dili ba? A, magsugod kita sa A, numero uno.

¹⁵⁹ Kinsa ma’y aduna og prayer kard A, numero uno? Tagsa-tagsa kamo namong tawgon, aron kung bakul man kamo mahimo namo kamong alsahon. Okey. Prayer kard A, numero uno. Kinsa’y aduna niini, ipataas ang imong kamot, kon asa ka man dinhi sa bilding? Sa maong kard, dinha sa may pinakaluyo. Mahimo ka bang moduol, gining, kung mahimo mo. Uno, dos, kinsa ma’y aduna og prayer kard nga numero dos? A, numero dos, mahimo mo bang ipataas ang imong kamot kung mahimo mo. . . . Makalakaw ka ba? Sige, umari ka dinhi, umari ka dinhi niining dapita. Numero tres. Kung mahimo mo ipataas dayon ang imong kamot, kon—kon tawgon na ta ka, para dili na nato kinahanglan pang maghulat og dugay. Prayer kard nga numero tres, mahimo mo bang ipataas ang imong kamot. Okey, usa ka lalaki dinha dapit. Sige, umari ka na dinhi, sir.

160 Prayer kard nga numero kuwatro, mahimo mo bang ipataas ang imong kamot sa gilayon, sa ingon ka dali nga mahimo mo. Prayer kard nga numero kuwatro. Okey. Numero singko. Basta ako na ganing matawag, tindog na dayon mo, numero singko. Okey. Numero sais, numero siete, numero otso, numero nuebe, numero diyes—diyes. Karon, uno, dos, tres, kuwatro. . . Diyes, sige. Onse, dose, trese, katorse. Ikaw nga nagaduol, sir, numero katorse ka ba? Okey. Katorse, kinse. Bueno, kana, kana lang. . . Igo na kana sa pagka-karon, igo na kana niining hapon, tungod wala na kita’y igong oras.

161 Karon ania. Buut ko nga ihatag n’yo kanako ang inyong bug-os nga pagtagad. Bueno, gisaad kini ni Jesus, nga, “Sa diriyut lamang panahon, ug ang kalibutan dili na makakita Kanako, apan kamo makakita Kanako.” Nagatoo ba kamo niana? Ang *kalibutan*—ang *kalibutan*, ang “ang sistema sa kalibutan.” Kita n’yo, sila ga- . . . hingsayran na Niya nga managsunod gyud sila sa mga urog ug mga ingon-anang butang. “Ug sila dili na makakita Kanako, apan kamo makakita Kanako.” Kay nagsaad man Siya, “Ako magauban kaninyo, bisan hangtud sa katapusan sa kalibutan.” Husto ba kana? Ug miingon ang Biblia, sa Mga Hebreohanon 13:8, “Siya mao sa gihapon kagahapon, karon, ug hangtud sa kahangturan.” Nagatoo ba kamo niana? Usa kana ka saad.

162 Karon, dili man ninyo kinahanglan nga maania gyud dinhi, aron nga mamaayo. Tungod ang bugtong butang nga kinahanglan n’yong buhaton mao’y toohan n’yo lang ang Pulong nga mao ang Kamatuoran. Karon hangyoon ko kamo, kung mahimo n’yo, nga magmatinahuron lamang ug maghilum sulod sa pipila ka gutlo.

163 Nakaduol na ba silang tanan, Billy? Wala pa ang numero dos, numero tres? Unsay sulti niya? [Nagaingon ang igsoong lalaki, “Numero tres na lang.”—Ed.] Ang numero tres na lang ba? Numero tres, prayer kard nga numero tres. Unsa, unsaon, unsa gani ang Mexicanong pulong para nianang, tres? Aduna ba’y makasulti? [Adunay nagaingon, “tres.”] Sige, siguradong nadungog gyud nila kana. Unsa, man, kon kinsa man ang aduna niana nga prayer kard, moduol na sa linya, kung mahimo? Oh, oo. Oh, sa hunahuna ko aduna na’y nakakuha niini, ug wala lang nahibalo, ug mao nga misibog na lang sila. Sige. Karon, karon unsa ma’y. . .

164 Nagatoo ba ang tanan karon sa tibuok n’yong—sa tibuok n’yong kasingkasing? Bueno, mag-ampo kita pag-usab kung ingon niana.

165 Ginoong Jesus, nasayod kami karon nga mahimo namong basahon ang Pulong, kutob sa among nahibaloan, nga isaysay Kini. Apan, Ginoo, Ikaw lamang ang Bugtong makapanghimatuod Niini. Ikaw lamang ang Bugtong makasulti

kon Kini ba'y husto o sayup. Ug, Amahan, ginaampo ko karon nga pagaablihan Mo unta ang mga mata sa mga tawo. Hinaut nga among makita ang usa ka paradox niining hapon, nga, Ginoo, igo na gayud aron makita sa mga tawo nga ania Ikaw mismo, nga Ikaw wala—wala gayud namatay, nga ang Imong Pulong mao sa gihapon kagahapon, karon, ug hangtud sa kahangturan. Kay, Ikaw man mismo ang Pulong. Alang sa mga may sakit, Ginoo, alang sa mga nagaantus; tingali'g daghan ang ania dinhi nga gikan pa sa nagkalainlaing bahin sa nasud, bahin niining nasud, sila tingali. . . sila'y nagaantus gayud, mao nga dili sila arang mangalipay sa mga panagtigum, sa laing pagkasulti, kung dili man sila mamaayo. Nagaampo ako nga ayohon Mo sila. Itugot kini, Ginoo. Ug karon kami'y mga tawo lamang sa pisikal, ug mahimo lang namo nga iwali ang Pulong ug isulti kung unsay Imong giingon nga Kamatuoran, karon Ikaw lang ang Bugtong makapahimong tinuod niini. Ginaampo ko nga igatugot Mo kini, sa Ngalan ni Jesus. Amen.

¹⁶⁶ Karon gusto ko gayud unta ang inyong bug-os nga pagtagad, sa makadiyut lang, ug ang tanan mamahimo uná nga manglingkod karon sa pipila ka gutlo. Bueno, sa nahibaloan ko, sa tinuod lang, wala ko'y si kinsa man nga nailhan nga nakita ko sulod sa—sulod sa bilding, nga ako nang nailhan. Bueno, dili man ninyo kinahanglan nga maania dinhi aron nga mamaayo, nasayod niana ang si kinsa man. Kita n'yo?

¹⁶⁷ Ngani adunay usa ka luoy'ng babaye, kaniadto, wala siya nakakuha og prayer kard, ingnon na natong ingon-ana, ug gihikap sa maong babaye ang bisti ni Jesus. Ug milingi Siya ug mitan-aw, ug miingon, “Kinsa ba'y mihikap Kanako?” Ug nangulipas silang tanan didto. Ug mitan-aw Siya sa palibot ug nakita kining luoy'ng babaye. Dili gyud maitago sa babaye ang iyang kaugalingon, tungod kay, kita n'yo, ang Espiritu sa Dios, nga anaa Kaniya, mao man ang nanguna Kaniya. Siya mao ang Pulong. Ug Kini mismo ang nagtultol ngadto sa babaye, ug gisultihan Niya ang babaye kung unsay sakit niini. Adunay talinugo ang maong babaye, ug naayo gyud kini. Gitooan niya kadto. Ug sa gilayon, sa kinasuloran sa iyang lawas, iyang nabati nga miundang na ang pag-agas sa dugo, (husto ba kana?) miundang didto mismo.

¹⁶⁸ Bueno Siya mao lamang sa gihapon karon. Dili n'yo man kinahanglan nga mamaania dinhi. Karon, miingon ang Biblia diha sa Bag-ong Tugon, nga, “Si Jesus Cristo ang atong Labaw'ng Sacerdote.” Nagatoo ba kita niana? Ang bugtong Labaw'ng Sacerdote nga aduna kita, ang bugtong Tigpangaliya nga aduna kita tali sa Dios ug sa tawo, mao ang Lalaki, nga si Cristo Jesus. Nagatoo ba mo niana? Ug miingon ang Biblia, “Siya ang Labaw'ng Sacerdote nga arang matandog sa pagbati sa atong mga kaluyahon.” Husto ba kana? Pila man ang nasayod

nga tinuod kana? Ipataas ang inyong kamot aron ilang. . . Sige. Dili diay ko anaa taliwala sa mga estranyo, niining Pulong.

¹⁶⁹ Karon unsaon man Niya pagpamuhat kung Siya mahikap ninyo Siya? Mamuhat Siya nga sama sa Iyang gibuhat kaniadtong ania pa Siya dinhi, tungod kay Siya man mao sa gihapon kagahapon, karon, ug hangtud sa kahangturan. Husto ba kana?

¹⁷⁰ Karon magtoo lamang kamo. Isulti n'yo lang, kini, "Karon, Ginoo, dugay na ako nagatambong sa mga panagtigum, kaniadto, apan motoo na gayud ako, karon. Ako—dili ko na hunahunaon ang akong kaugalingon. Motoo lamang ako sa tibuok kong kasingkasing, nga ania Ikaw dinhi. Ug aduna ako'y panginahanglan, ug Ikaw lamang. . . Tabangi ako, Ginoo." Kita n'yo? Karon buhata n'yo kana. Ayaw kamo pagkabalaka; basta—basta magtoo lang kamo nga malinawon.

¹⁷¹ Ang gasa nga pagtoo dili man usa ka butang nga imong dawaton ug aduna ka'y pagabuhaton niini. Ang gasa nga pagtoo mao gayud ang maipadaplin mo ang imong kaugalingon. Ang maong gasa mao ang pagpadaplin mo sa imong kaugalingon.

¹⁷² Karon aniaiy usa ka babaye nga nagatindog. Nasayod ang Amahang Dios, kutob sa akong nahibaloan, nga wala ko pa sukad-sukad nakita ang maong babaye sa tibuok kong kinabuhi. Siya'y usa gayud ka estranyo kanako. Ug, wala pa gani sa duha o tulo ka tawo ang akong nakita dinha, nga akong nailhan.

¹⁷³ Sa tan-aw ko si Mrs. Vayle kining nagalingkod dinhi, ang asawa ni Igsoong Lee. Dili ako sigurado. Dayon nakaila pud ko niining tulo o upat ka lalaki nga nagalingkod dinhi mismo. Kutob sa nasayran ko, sila lang ang akong nakita sa panagtigum niining orasa, nga mga kaila ko. Nagatoo ko nga si Igsoong Anthony Milano kanang nagalingkod dinha, nga taga New York. Si Igsoong Pat Tyler usab nga taga Kentucky. Gawas kanila. . . Kabalo ko nga si Fred Sothmann anaa sab dinha kon asa man, nadungog ko man gud siya nga misinggit og "amen" kaganina. Kana, mao lang kana tanan, ug nasayod niana ang Langitnong Amahan.

¹⁷⁴ Ug kining babaye nga nagatindog dinhi, wala ko pa siya nakita sukad-sukad. Wala pud ko'y ideya kung unsay hinungdan nga ania siya dinhi. Usa lamang siya ka babaye nga misaka dinhi sa entablado, sama ra kaninyo nga nagalingkod dinha.

¹⁷⁵ Karon, kung nagkinahanglan kining maong babaye, bueno, kung ingon-ana ako—ako, kung matabangan ko lang unta siya, ako—motabang gayud ako. Apan karon ako—ako. . . Nagadepende kana kung unsay iyang gikinahanglan. Kung kuwarta man, ako—tingali'g makatigum ra ko og lima o napulo ka dolyares. Gawas niana, wala na ako mahibalo, kita n'yo, gawas lang kon hatagan ko siya og tseke nga simulatan na og petsa kung kanus-a puedeng kobrahon, inig madawat ko na ang

akong suweldo sa sunod bulan. Apan karon unsa kaha kung aduna siya’y problema sa panimalay? Nan moingon ako, “Lakaw ug kuhaa ang imong bana, magkauban natong hisgotan kini, kay tingali’g matabangan ko kamo. ‘Wala man ko’y paagi para makauli?’ Bueno, hangyoon ko ang si kinsa man kung mahimo ka ba nilang dalhon, ihatud pauli, pauli sa inyong lugar. Asa dapit nga kalye ka ba nagapuyo?” O kung unsa man kana, wala ako mahibalo. Apan kung balatian man kana, nan ako—wala gihapon ko mahibalo. Kita n’yo? Pero wala gyud ko makaila sa maong babaye.

¹⁷⁶ Apan aduna gayu’y Usa nga ania dinhi, kining Pulong, nga nagsaad, “Ang mga butang nga Akong ginabuhay pagabuhaton usab ninyo.”

¹⁷⁷ Karon, tingali, unsa kaha kung masakiton kining babaye, tingali’g duna siya’y kanser, tingali’g duna siya’y TB, ug, o kung unsa man nga dili na masalbar og tambal tungod sa—sa kagrabe na niini? Bueno, karon, dili ko mahimo, dili ko gayud mahimo sa unsa mang paagi nga ayohon ang babaye.

¹⁷⁸ Apan karon kung ipadayag Niya kanako kung unsay ginatinguha niining babaye, sama lang sa gibuhay Niya kaniadto sa babaye nga atua sa atabay, o kaha sama sa pagsulti Niya kang Natanael, o—o pagsulti kang Simon kung unsay ngalan niini. Miingon, “Ang imong ngalan mao si Simon. Anak ka ni Jonas. Sugod karon pagatawgon ka na nga *Pedro*, nga nagakahulogan og ‘gamay’ng bato.”

¹⁷⁹ Bueno, karon, kung aduna man Siya’y pagabuhaton nga sama niadto dinhi sa atubangan ninyong tanan, nan nagapakita lang nga Kamatuoran gyud ang Pulong. Karon, pila man ang nagatoo niana? Aduna ba dinhi ang nakaila sa babaye, ipataas ang inyong kamot, kon duna ma’y si bisan kinsa, dinhi sa bilding? Oo, daghan kaninyo ang nakaila kaniya. Okey. Pero nasayod ang Amahan nga wala ako nakaila. Bueno, karon, hibalon nato kung unsay isulti Niya. Ug kana, usa kaha kana ka paradox? Wala ko mahibalo kung unsay problema diha kaniya. Wala sab ko mahibalo kung unsay hinungdan nga ania siya, o unsa man mahitungod kaniya. Apan nasayod mismo ang Dios niana.

¹⁸⁰ Estoryahon ko ang babaye. Karon kini ang pinakauna nga tawo nga miatubang kanako, sulod sa tulo ka bulan. Karon buut ko lang nga makig-estorya sa maong babaye, sa makadiyut lang. Ug para sa unsa man kini? Aron sa pagkontak sa iyang espiritu. Sama sa gibuhay ni Jesus kaniadto sa babaye nga atua sa atabay, gikontak uná ang espiritu niya.

¹⁸¹ Karon, kung mahimo ni Ginoong Jesus, gining, nga ipadayag kanako kung unsay problema kanimo, o para sa unsa nga ania ka karon, o unsa man nga butang mahitungod niana, nga hingsayran mo nga wala gyud ko’y unsa man nga nahibaloan, o

mora'g ingon niana, motoo ka ba nga Siya kini? Siguradong Siya gyud kini, dili ba? [Nagaingon ang igsoong babaye, "Oo."—Ed.] Siya gayud kini. Kung buhaton man Niya, nan mapasalamaton kitang tanan tungod hingsayran nato nga kita'y...nga ang Iyang Pulong husto gayud, kung ingon niana mahimo natong ipahimutang ang atong pagsalig dinha.

¹⁸² Karon, kung mahimo Niyang ipadayag kanako, kung unsay imong sakit, ug wala ako makaila kanimo, ug nasayod ka niana; apan karon kung mahimo Niyang ipadayag kanako kung unsay imong sakit, o ang usa ka butang mahitungod kanimo, nan nagapakita kana nga aduna gyu'y Espiritu dinhi, kon asa man, nga mao'y nakaila kanimo, ug nasayod ka nga dili kana ako. Busa dili mamahimo nga tawo kini, kondili ang Espiritu gyud kini. Ug mao kana ang gikasaad sa Dios sa niining panahon sa Efeso. Nagatoo ka ba niana nga mao ang Kamatuoran? [Nagaingon ang igsoong babaye, "Oo, nagatoo ako."—Ed.] Hinaut nga itugot Niya kini.

¹⁸³ Duna ko'y nakita nga usa ka butang, nagaantus siya tungod sa sakit nga mora'g sinus *dinha* dapit sa iyang ulo. Tinuod kana. Dili ba? Ipataas ang imong kamot kung tinuod kana. Apan kung sinus lang dili man kana magpahinungdan kanimo nga mang-hatsi nga ingon niana, busa aduna ka'y hay fever, usab. Husto kana. Dili ka taga Phoenix. Taga didto ka sa dapit kon diin dunay—dunay daghang mga bungtod, og mga kahoy. Taga Flagstaff ka. Husto kana. Nagatoo ka ba nga mahimong isulti kanako sa Dios kung si kinsa ka? [Nagaingon ang igsoong babaye, "Oo."—Ed.] Ikaw si Mrs. Earl. Oo. ["Husto."] Husto kana, dili ba? Karon lakaw na, nga nagatoo, nga tapos na kanang tanan.

¹⁸⁴ Bueno Siya mao ba sa gihapon kagahapon, karon, ug hangtud sa kahangturan? Karon, nasayod ang Langitnong Amahan nga karon ko pa lang nakita ang maong babaye. Nakita n'yo gayud ang Pulong nga gipanghimatud-an. Karon, dili kini ako, usa lang man ako ka tawo. Sama ra niining mikropono, amang kini kon wala ako nga magasulti dinhi, o si kinsa man. Ug mao usab ang tawo siya'y ingon ka amang. Apan ang Espiritu kini, ug kini nga Espiritu anaa mismo dinha sa inyong taliwala. Kita n'yo? Siya mao ang mananambal, dili ako.

¹⁸⁵ Kumusta ka, sir? Usa na usab ka tawo nga dili ko igkaila. Wala ako makaila sa lalaki. Karon, kutob sa nasayran ko, wala ko pa siya nakita sukad-sukad sa tibuok kong kinabuhi.

¹⁸⁶ Apan karon ang Espiritu, ang Balaang Espiritu, ang Balaang Espiritu ug si Jesus Cristo mao ra mismo nga Espiritu. Ang Maong dinihogan, si Jesus, ang Tawo, nga mao ang Anak sa Dios, apan ang Balaang Espiritu nga anaa Kaniya mao ang Dios. "Ang Akong Amahan nagapuyo Kanako." Kita nyo, ang Balaang Espiritu Kini, busa ang Dios gihapon kini.

187 Karon kung mahimo ko lamang maipadaplin ang akong kaugalingon, mahimo niining lalaki, nga maipadaplin ang iyang kaugalingon, dayon patay na kana nga bahin, kung ingon-ana makapamuhat na ang Espiritu sa Kinabuhi. Kita n'yo? Mao kana kon nganong nagahulat uná ako sa makadiyut, aron makita kung unsay mahitabo hangtud nga mosugod na ang pagdihog.

188 Kung ang Ginoong Dios, ingon nga anaa kita sa Iyang Presensiya, mahimong ipadayag kanako, sir, kung unsay imong sakit, o ang usa ka butang nga nabuhat mo, o—o usa ka butang mahitungod kanimo, unsa man nga butang. Sa tinuod lang, kon magka-estoryahanay pa kita og dugay, mas daghan pa ang mahibaloan. Apan, nakita mo, may uban pa man nga nagatindog sa linya. Apan kung isulti lang Niya kanako kung unsay imong sakit, motoo ka ba kanako nga Iyang alagad, ug toohan nga ania Siya karon? [Nagaingon ang igsoong lalaki, “Oo.”—Ed.] Duna ka’y hernia. Husto ba kana? [“Tinuod gyud. Oo.”] Husto.

189 Karon moingon ka, “Giunsa man pagkahitabo niana?” Unta kung nahibaloan ko lang. Walay si kinsa man ang makasaysay niana. Ingon niana ang paradox. Kita n'yo?

190 Ania, aron nga imong masayran usab, aduna pa ko’y lahi nga nakita, usa ka pag-eksamin; duna ka’y sakit sa kasingkasing, usab. Ipataas ang imong kamot. Mr. Anderson, puede ka nang mouli karon, ayohon ka na ni Jesus Cristo. Husto kana. Magtoo ka lamang, magmaaduna og pagtoo. Ayaw pagduhaduha.

191 Kumusta ka, sir? Dili kita magkaila sa usa’g usa. Wala ako makaila kanimo. Sa hingsayran ko, mao kini ang unang higayon nga nakita ta ka, aron maila ta ka. Husto kana. Apan nakaila man Siya kanato, kanatong duha.

192 Karon nasayod ka ba kon nganong nagakahitabo kini? Ang Iyang grasya ang nagtugot niini, aron nga maaghat niini ang mga tawo nga masayod gyud sa Dios. Karon, wala ko’y unsa man nga nahibaloan mahitungod kanimo, wala gayud ako makaila kanimo, usa ka lang ka estranyo nga tawo nga mianhi dinhi. Karon bug-os gayud nga paradox kon mahitabo ang usa ka butang, nga—nga masayran ko kung unsay imong sakit, o ang usa ka butang nga imong nabuhat, o ang usa ka butang nga dili mo unta angay nga gibuhat, o kaha ang usa ka ka butang nga angay mo untang gibuhat, o kung si kinsa ka man o ang usa ka butang mahitungod kanimo. Mahimong usa kini ka paradox, tungod wala gayu’y paagi para masayran kana ni bisan kinsa, gawas lang sa kung unsa nga kapadayagan nga dili-makita. Husto kana. Karon kung buhaton Niya kana para kanimo, tali kanimo ug kanako, aron ang mga mananambong. . .dili ingon nga pagpasigarbo, kondili aron nga makita nila nga ania mismo ang—ang maong Efeso, ingon nga mao kini ang butang nga nagasumpay tali sa denominasyon ug sa Mahimayaong Yuta.

Gisaad Niya kini, aron nga makasigurado sila nga ang atong ginasulti mao gayud ang Kamatuoran.

¹⁹³ Karon ang maila ka, nasayod ka nga wala ako makaila kanimo. Kon mao man, ipataas ang imong kamot aron nga makita ka sa mga tawo. . . ako, wala ko pa nakita sukad-sukad ang maong tawo sa tibuok kong kinabuhi. Usa lang siya ka lalaki nga nagatindog dinhi. Pangutan-a ninyo ang si kinsa pa man. Apan nagaantus ka tungod sa hernia. Aduna ka usab og almoranas. Husto kana. Gikan ka pa sa halayo, aron lang makaanhi dinhi. Dili ka gani usa ka Amerikano. Usa ikaw ka taga-Canada. Imong giuban ang anak mo nga lalaki nga adunay sakit sa pangutok. Tinuod kana. Gusto mo ba nga isulti ko kanimo kung taga asa ka? Gikan ka sa probinsya sa Saskatchewan, sa dakbayan sa Saskatoon. Magtoo ka sa tibuok mong kasingkasing, ug papaulion ka sa Dios nga naayo na, uban ang imong anak, kung motoo ka. Nagatoo ka ba niini? Panalanginan ka sa Dios.

¹⁹⁴ Nagatoo ba kamo? Ang Ginoong Dios sa gihapon nagpabilin nga Dios. Kita n'yo? Wala na'y lain pa gawas Kaniya.

¹⁹⁵ Kumusta ka? Aniyay usa ka babaye, nga estranyo kanako, tingali'g mas magwang lang. Wala ko pa siya nakita sukad-sukad; apan siya'y—usa lamang siya ka babaye nga nagatindog dinhi. Kinahanglan ko nang magdali, tungod aduna na lang ko'y siete o otso minutos karon, kita n'yo. Pagtan-aw lang dinhi. Nagatoo ka ba nga tinuod kining mga butanga? Sa tibuok mong kasingkasing? Nasayod ka nga imposible gayud para kanako nga makahibalo kung unsa ma'y problema kanimo, o sa bisan unsa mahitungod kanimo. Apan dili gyud imposible para sa Dios nga makahibalo, tungod kay nasayod na Siya bisan sa wala pa magkaaduna og kalibutan kaniadto. Dili ba husto kana? [Nagaingon ang igsoong babaye, “Husto kana.”—Ed.]

¹⁹⁶ Pila man ang nagatoo nga tinuod kana? Oo. Nasayod gani Siya sa matag higayon nga mamilok ka. Tungod Siya'y walay-kinutoban. Ug palandunga lang ninyo; nga pinaagi sa Iyang grasya gipresentar Niya, pinaagi sa Iyang Ebanghelyo, ang mao gihapong butang nga gisaad Niyang pagabuhaton. Kung ingon-ana aduna gyu'y Langit, ug moadto kita didto. Ug ania na kita niini nga Efeso karon mismo. Ania na kita dinhi, ingon nga migawas kita gikan sa usa, pasulod ngadto sa usa pa.

¹⁹⁷ Daghan kaayo'y problema kanimo, mga komplikasyon, og daghan kaayo nga mga problema. Ug dili ka taga dinhi. Gikan ka pa sa kasadpan. Taga California ka. Husto kana. Aduna ka'y anak usab nga nagaantus. Husto kana. Ikaw. . . Dunay usa ka butang, sige kong makita ang tubig o usa ka dakung halapad nga linaw. Oh, kini'y, aduna ka'y—aduna ka'y kaila nga suud kanimo, nga nagapuyo sa Chicago, nga nakaila kanako. Husto kana. Tinuod kana. Karon, nasayod ka man nga wala ako makaila

kanimo, apan nagatoo ka ba nga nakaila ang Dios kanimo? Mrs. McGuire. Naangkon mo na ang imong hangyo. Pauli na nga nagapasalamat sa Dios.

Kumusta ka? Kusgan ug batan-on ka pa.

¹⁹⁸ Apan ang sakit ug balatian wala ma'y ginapili nga tawo. Pila man ang nasayod niana? Nasayod gyud kita nga wala kini'y ginapili nga tawo.

¹⁹⁹ “Kung mahimo mong toohan sa tibuok mong kasingkasing ug sa tibuok mong kalag!” Mobyia na kanimo ang maong asthma kung motoo ka lang sa tibuok mong kasingkasing.

²⁰⁰ Kanang sakit sa dughan, nagatoo ka ba nga mobiya na kana kanimo, usab, igsoong babaye, ug mamaayo ka na? Unsa ma'y imong gihikap? Baynte ka piye ang gilay-on niya kanako, o sobra pa. Ang Ginoo mao'y iyang gihikap. Ang paghuot kana, sa mga kaugatan. Mamaayo ka na.

²⁰¹ Usa ka halangdon nga butang ang hinungdan nga nagatindog kining batan-ong babaye dinhi. Siya'y bug-os gayud nga dili ko igkaila. Wala ko pa nakita sukad-sukad ang maong babaye. Apan gidala siya dinhi sa ubang tawo. Ug ang hinungdan nga ania siya dinhi, tungod kay nakapatalinghug siya sa usa ka teyp nga akong gihimo. Ug ania siya nga nagatinguha og bautismo sa Espiritu Santo. Mao gayud kana'y iyang gianhi dinhi. Tinuod kana, batan-ong babaye. Husto kana. Duol ka ngari.

²⁰² Minahal nga Dios, kining anak nga nagatindog dinhi, nga mogawas na gikan sa kangitngit paingon sa Kahayag, hinaut nga madawat niya ang Balaang Espiritu; duawa ang iyang panimalay ug ang iyang mga minahal sa kinabuhi, ipakita kanila ang halangdong mga butang nga gibuhay ni Jesus para kaniya. Amen.

Panalanginan ka sa Dios. Ayaw pagduhaduha. Tumoo ka.

²⁰³ Mahimo gyud sa Dios nga ayohon ang tanang matang sa pagkanerbiyos ug (nagatoo ka ba niana?) sakit nga hubak, ug himoon ka nga mamaayo na. Nagatoo ka ba niana? Kung ingon-ana lakaw na, nga nagatoo sa bug-os mong kasingkasing. Hinaut nga panalanginan ka sa Dios, igsoon.

²⁰⁴ Pila na ba'y edad mo? [Nagaingon ang igsoong babaye, “Traynta'y-otso.”—Ed.] Kinahanglan mo gyud nga makalingkawas na niana nga pagkanerbiyos sa gilayon, dili ba? Tungod nga nakasinati ka na sa tanang mga pagtukar-tukar nga kaluya, ug tanan nang nagakahitabo kanimo. Apan mibiya na kana kanimo karon. Mao, gayud.

²⁰⁵ Nagaayo ang Dios og pagkanerbiyos, og sakit sa tiyan, usab. Nagatoo ka ba niana? Kung ingon-ana lakaw ug pagkaon na sa imong gusto. Giayo ka na ni Jesus Cristo.

²⁰⁶ Nagatoo ba kamo dinha, ang matag usa kaninyo?

207 Aniyay usa ka lalaki nga nagalingkod nga naka—naka-kamiseta, nagatan-aw siya kanako, oo, gitan-aw pud niya ang iyang kamiseta karon mismo. Oo. Nagatoo ka ba nga mahimong ayohon sa Dios ang sakit sa glandula, og himoon ka nga mamaayo na? Nagtoo ka mismo (dili ba?), sa mao mismong oras nga naayo kining batang lalaki sa sakit nga hubak. Pauli na, pinalangga, mamaayo ka na, usab, kita mo. Magtoo ka sa bug-os mong kasingkasing.

208 Kanang gamay'ng babaye nga nagalingkod tupad sa imong asawa dinha, matoohan mo ba nga mamaayo ang imong mga mata, usab? Nagatoo ka ba nga ayohon sa Dios kana nga sakit sa mata? Ipataas ang imong kamot kung mao ba gyud kana ang imong ginaampo. Kita mo?

Unsa ba'y ilang gihikap? Si Jesus Cristo nga Anak sa Dios.

209 Nagatoo ka ba? Nagatoo ka ba, batan-ong lalaki? Mahimong ayohon sa Dios kana nga sakit sa dugo, himoon kana nga mamaayo na, (motoo ka ba niana?) wagtangon usab kanang sakit nga diabetes ug himoon ka nga mamaayo na. Nagatoo ka ba niana? Sultihi Siya nga nagatoo ka niini, ug lakaw na.

210 Duol ngari, sir. Duna ka'y sakit sa tiyan. Nagatoo ka ba nga mahimong ayohon sa Dios kana, pagaayohon kana? [Nagaingon ang igsoong lalaki, "Oo, nagatoo ako."—Ed.] Lakaw na, og toohi kini; mamaayo ka na, mamaayo gayud.

211 Duol ngari, dalha kanang batang lalaki. Tan-aw dinhi, dong. Gikan pa kamo sa halayo. Usahay ang panagkalahi sa gihabugon sa lugar, ang pag-usab-usab sa klima, mao kana usahay, ang makapaayo sa sakit nga hubak. Apan aduna gayu'y usa ka sigurado nga kaayohan, si Jesus Cristo nga Anak sa Dios. Gihatag Niya ang Iyang Anak, aron nga mamaayo ang imong anak. Nagatoo ka ba niana? Toohi kana sa bug-os mong kasingkasing, ug mobiya na kana kaniya. Mamahimong normal, og himsog na siya nga batang lalaki. Panalanginan ka sa Dios, igsoong babaye.

212 Nagatoo ka kamo? Nagapamuhat ba sa gihapon ang Dios og mga paradox? Mga butang nga dili arang maisaysay, dili makatarunganon, dili masabtan sa mga tawo, og dili gyud matugkad kon giunsa pagkahitabo. Apan tinuod gyud kini, dili ba? Karon pila man ang nakabati, ug nasayod diha sa inyong espiritu, nga aduna gayu'y Butang dinhi nga lagpas na sa tawhanong panabot?

213 Karon, sa hunahuna ko nakatawag na 'ta og dili mominus sa kinse ka tawo diha niana nga linya, ang matag usa kanila; ug dunay upat o lima, unom, nga wala sa linya, walay prayer kard, o kung anaa man sila dinha sa linya, og dinha sa mga mananambong. Apan aduna na lang kita'y usa ka minuto karon, para sa pagtapos.

214 Gibuhat ba Niya kini nga ingon ka eksakto gayud sa kung unsa ang pagkasulti Niya nga Iyang pagabuhaton? Karon pila man ang nagatoo nga Siya mao sa gihapon kagahapon, karon, ug hangtud sa kahangturan, og nakabati sa Iyang Presensiya? Karon nakita man ninyo ang Iyang Presensiya. Karon nakakita mismo ang inyong mga mata, nakasabot ang inyong mga igdulungog, ug gipanghimatud-an sa Dios, sa inyong atubangan mismo, ang Iyang Presensiya. Ug mao kana ang nagapabati kaninyo sa tanang panahon, ang nagakondena kaninyo sa dihang masayup kamo, ug nagasulti kaninyo nga dili n'yo pagabuhaton kana, kanang mao ra nga Dios nakita gayud ninyo niining hapon, diha sa Iyang mga buhat. Pila man ang makasulti og “amen” niana? Oo, mao gayud. Karon ania gyud Siya.

215 Aduna ba dinhi sa atong taliwala, nga dili pa usa ka Cristohanon; wala pa nakahimo og unsa man nga pagsugid, o wala pa gayud nakasimba sukad-sukad? Mahimo ba kamong motindog, ug moingon, “Buut ko nga motindog, dili para kanimo, ministro; kondili buut ko nga motindog samtang ania ako sa Presensiya niining Persona, si Jesus Cristo, Nga mao ang Balaang Espiritu nga nagapaibabaw kanato karon. Buut ko nga motindog ug moingon, ‘Ginatinguha ko nga Imo akong luwason sa akong mga kasal-anan’”? Mao lang kana ang gusto ko nga inyong pagabuhaton, ang motindog lang, ug mao na kana ang magapamatuod. Kana lang ang angay natong buhaton niining orasa. Moingon, “Gusto ko nga mamahimong usa ka Cristohanon.” Tindog kamo, ug dayon mahimo na kamong manglingkod og balik.

216 Aduna ba’y usa dinhi sulod sa bilding? Pila man ang ania sa bilding? Wala ko unta gisulti nga, “Aduna ba’y usa?” tungod kay mahimong adunay sobra pa sa usa. Pila man dinhi sa bilding ang motindog karon mismo, ug moingon, “Nasayup ako, Dios. Pasayloa ako. Motindog ako aron maghatag Kanimo og testimonyo nga nasayup ako. Magpabilin ako samtang ania ako sa Imong Presensiya. Magpabilin ako”? Tumindog kamo.

217 Aduna pa ba’y usa, aduna ba’y labaw pa sa usa? May usa ka kamot. Panalanginan ka sa Dios, batan-ong lalaki. Aduna pa ba? Panalanginan ka sa Dios. Aduna pa ba? Panalanginan ka sa Dios. Panalanginan ka sa Dios. Panalanginan ka sa Dios, igsoon. Aduna pa ba? Panalanginan ka sa Dios, dinha sa luyo. Aduna pa ba, “Nasayup ako. Dios, pasayloa ako”? Panalanginan ka sa Dios, sir. “Nasayup ako. Ako—pasayloa ko, Ginoo.” Panalanginan ka sa Dios. Panalanginan ka sa Dios. Panalanginan ka sa Dios.

218 Aduna ba’y nagduhaduha kaniadto mahitungod niini nga ministerio, ug karon kumbinsido na kamo nga tinuod kini? Ipataas ang inyong kamot, ug moingon, “Dios, pasayloa ako.” Ipataas lang ang inyong kamot, moingon, “Ako—medyo

nagduhaduha ako kaniadto, Igsoong Branham; pero wala na karon.” Ipataas ang inyong kamot. Wala ni usa? Salamat.

²¹⁹ Pila man ang nagatoo Niini? Dili kini mahimong ako; kondili si Cristo kini, ang Anak sa Dios. Salamat. Kung ingon niana inyong makita ang labaw pa nga mga butang kay sa niini nga nabuhat na, basta motoo lamang kamo. Magpabilin lang kamo kang Cristo. Buhaton ko usab ang mahimo ko aron magpabilin Kaniya, ako mismo.

²²⁰ Karon pila man ania dinhi nga nagmasakiton ug nagkinahanglan, ipataas ang inyong kamot, “Ako’y—nagmasakiton ako, Igsoong Branham, nagkinahanglan ako”? Kita n’yo, tan-awa n’yo ang mga tawo. Karon mahimo n’yo bang buhaton kini ug motoo lang gayud sa akong isulti? Ipandong nato ang atong mga kamot diha sa usa’g usa, samtang ginapataas ko usab ang akong mga kamot nganha kaninyo.

Mag-ampo kita.

²²¹ Minahal nga Dios, ginadala ko Kanimong kining diyutay’ng mga mananambong, niining hapon, diin among napatalinghugan ug nabasa ang Pulong sa Dios. Nasayod kami nga ang matag tipik niini Kamatuoran, tungod kay Pulong Mo man kini. Dili lamang kami nagatoo nga tinuod kini; kondili nasayod sab kami nga tinuod gayud kini. Nakita Ikaw namo, Ginoo, nga namuhat og butang nga nagpahimo sa mga tawo nga masayod nga aduna sa gihapon. . . Gawas sa paradox mahitungod sa—sa kalibutan, ug sa kawanangan, ug sa natural nga kabalaoran sa Dios, nakita namo dinhi ang balaod sa kamatayon nga nagapanglihok sa lawas sa tawo, kon diin napakyas ang siyensiya nga—nga ayohon pinaagi sa ilang pagtuki. Ug, Ginoo, mapasalamaton gayud kami alang niini nga mga tawo. Wala namo sila gipakaubos. Mapasalamaton hinoon kami alang kanila. Apan, Ginoo, pagmoabot na sa punto nga wala na sila’y mahimo pa, bueno makita man namo ang Imong gamhanang kamot nga nagapanglihok; ingon nga hingsayran namo nga walay tawo ang makaayo kanila, tungod kay miadto na man sila sa doktor, o kaha mitumar na og unsa man nga tambal. Apan ang makita ang Anak sa Dios nga nagakunsad, ug nagatuman sa saad, nga ginatoohan namong tanan.

²²² Ug ang matag tawo nga nagpataas sa ilang kamot, nga wala pa naluwas, ug—ug nagtinguha nga mamaluwas. Dios, aduna gyu’y nagpasidaan sa ilang kasingkasing. Dunay uban kanila nga miingon nga sila “nasayup,” tingali’g nag-backslide kaniadto ug naninguha nga makabalik. Ginaampo ko nga dawaton Mo ang matag usa kanila pag-usab. Kay nasayod man sila, Ginoo, ug nasayod. . . Daghan kanila ang mahimong nakaila na kanako, o nahibalo na mahitungod kanako, sulod niining nangagi nang mga katuigan, ug nasayod nga walay maayong butang diha sa tawo, ug ilabina kanako. Unsaon man

pagkaaduna og maayong butang? Apan bisan pa niana nakita nila ang Pulong, nga gisaad sa Dios, nga napadayag. Kumbinsido sila nga Kamatuoran Kini. Mao nga gidawat nila Kini.

²²³ Daghan pud ang ania dinhi nga dili nako madala sa entablado. Ug, Amahan, ginapamatud-an Mo ako, nga wala gayud ko sukad miingon nga kini'y butang nga mahimo kong buhaton, kondili nga ginatugyan ko lang ang akong kaugalingon nganha Kanimo, ug ginatugotan Ka nga ipapadaplin ako ug ipahimutang ang Imong Espiritu dinha aron mao'y mamuhat. Karon, Amahan, ingon nga nakita ko nga ang usa ka tawo makahimo man niini, ang uban makahimo pud niini, ginaampo ko nga ang matag usa nga nagapandong sa ilang mga kamot nganha sa usa'g usa, nga nagmasakiton ug nagaantus, mamaayo na niining orasa mismo.

²²⁴ Itugot nga ang gamhanang Balaang Espiritu moagi sa tibuok bilding karon mismo ug himoon nga mamaayo ang matag usa. Luwasa ang matag usa, Ginoo. Ihatag ang ingon niini nga kasinatian. Ibubo ang Espiritu Santo, Ginoo, sa niining mga mananambong. Oh, nagalaum kami nga mamuhat Ka og mahimayaong mga butang sa niining moabot nga semana. Itugot nga mamaingon gyud kini, Ginoo, karon mismo, sa Ngalan ni Jesus Cristo.

²²⁵ Karon manindog kitang tanan. Nagatoo ba kamo sa bug-os n'yong kasingkasing? Karon mahimo kaha sa atong igsoong babaye, nga anaa dinha sa piyano, nga hatagan kita og—og—og gamay'ng tono niining: "I Will Praise Him, I Will Praise Him." Nadungog n'yo na ba kana?

Karon awiton nato kini, nga magkadungan. Bueno nagalaum kami nga makita kamo ugma sa gabii. Karon pormal na natong ipapauli ang mga tawo, sa makadiyut lang, apan gusto ko uná nga awiton kini nga awit uban kaninyo. Sige, atong awiton:

I will praise Him,

Ipataas nato ang atong mga kamot.

I will praise Him,

Praise the Lamb for sinners slain;

Give Him glory all ye people,

For His Blood has washed away each stain.

²²⁶ Iduko nato ang atong mga ulo karon alang sa pangpauli na nga pag-ampo. Sige, si Igsoong Jewel Rose ang magpapauli kanato.

Panalanginan ka sa Dios, Igsoong Rose, samtang atong . . .



USA KA PARADOX CEB65-0117
(A Paradox)

Kining Mensahe ni Igsoong William Marrion Branham, una giwali sa Ingles niadtong Domingo sa hapon, Enero 17, 1965, para sa Full Gospel Business Men's Fellowship International sa Westward Ho Hotel sa Phoenix, Arizona, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org